



靖海紀略
(兩種)







靖海紀略

鄭茂撰

編主五雲王
編初成集書叢

略 紀 海 靖
(種 二)

中華民國二十五年六月初版

發行人

王 雲 五
上海河南路

印刷所

商務印書館
上海河南路

發行所

商務印書館
上海及各埠

前令鄭壺陽靖海紀略

嘉靖甲寅夏四月五日乙亥夜漏下三刻。墩卒報二海舶自乍浦而來。昏黑不辨誰何。余卽登城遠望。召居民分塚以守。越六日丙子黎明。二舶抵龍王塘吹法螺。衆乃知爲賊云。先數人泅水登岸。餘皆臨其後。各衣青白。執弓矢利器。合五百餘徒。直趨東門。箭之入也。電飛雨驟。軍民莫敢俯視。乃張佛狼機一條。鞭塵擊賊稍引退。因自焚其舟。並小東關及居民二十餘家。遂沿塘而南。渡興福橋葉家橋。以至西門。委蛇曲折。若熟路然。先是兵憲陳公在縣旬餘。因廣陳告急。乃以兵五百往。而是晚賊至矣。衛縣官奉委而出。惟余與簿陳子鍊及揮使方君泰彭君端在。時丁把總劉大仲諸兵皆隨盧參戎往征廣陳。城中股慄。無敢攖其鋒者。余乃急塞四門。諭居民以城賊不兩立。須效死。衆皆惟命。余恐賊多譎。因謀方揮使募勇夫出偵焉。果有二賊伏塘下。斬首級一。並取船中鐵佛狼機三架以歸。噫。幸其無藥可試耳。不然。虎而翼之。害又當若何。已時遂攻西門。燬民房三百餘。自天寧寺而止。皆鞠爲煨燼。煙塵蔽空。矢鏃交集。城中火器響應。屹立不少動。擊斃一賊。餘遂退屯鍾孫諸家及天寧寺左右。晚復分擾城下。羣情洶洶。乃與諸君分守各門。方東彭北。後改指揮劉君潮。南西則余與陳。余仍左右督焉。邑博士鄭君。歐陽君。許君。暨諸縉紳先生。賓造秀士。咸徒步鼓勇爲士卒先。每塚軍民各一。合十有五塚。胥史一人攝之。益以敵臺驍兵勇壯。

老人攝之人各米二升。燭五枝。夜及子。賊以長竿掠北城探虛實。守堞者以亂石擊退。是夜馬不停鞭。火不滅。槊鈴矢石之聲更相屬。繞城六匝。天始辨曙。賊乃解圍。卽二家晨炊而去。遂侵錢家店。半邏橋。未時抵嘉興郡。郡備亦虛。不虞其猝然至也。幸兵憲公自平湖提兵來援吾鹽。中途聞報而疾趨抵郡。甫入關。而賊先鋒白旗至矣。燬東關外數十家。其沿城一帶。則府中業已撤而去之。是日兵憲暨郡守劉公親誓杭湖等兵出戰於鹽倉橋。斬獲二十餘。賊披靡卻還吾邑。至半邏橋宿焉。自賊之來也。請兵告急。無慮數十次。竟莫有至者。乍浦戰艦亦寂然無聞。平日象餌胡爲耶。日已西矣。盧丁始提二千餘兵來。聞賊已長驅遂兼程前進。戊寅與賊遇於本縣之孟家堰。倉卒阻河爲陣。不知賊已先伏舟中。預作奇兵。初一陣。劉大仲先鋒少捷。再一陣。賊鼓噪而前。伏從中出。我兵大潰。自相蹂藉。鎗死箭死刃死者二百餘。溺死者至千以上。海寧衛指揮李元律。旗牌千戶薛琪。宋應蘭死之。義士劉大仲與其部下殲者過半。餘皆漳廣龍泉泰和諸兵。橫尸蔽野。疊血成川。茸茸麥隴。轉作戰場。浙浙風聲。盡皆鬼泣。自用兵以來。未有若此之酷且多也。報至。兵憲公郡守公痛惋垂涕。卽命官構殮。鄉諫議大夫錢公復市地募衆。諭者民張亭董其事。亭不辭臭腐。朝夕掩瘞。自是道無遺骸。余前後亦遣人督之。然諫議之力居多。余守土者且愧焉。乃飯僧修饑。爲文以吊之。初。軍門之遣劉大仲也。專爲吾鹽計。自入春以來。盧參戎召之無虛日。淞江海沙二捷。實爲先鋒。盧反敵而抑之。衆憤恨有後言。比三月終。諸兵乃復以故土。盧又日召之。余已逆知其必有今日。乃貽書往止之。謂金山以北。原非浙轄。舍己急人。義實不然。盍休養之。以爲鹽百萬生靈計。疇昔之

事不足以鑒乎。渠固執弗允。乃請諸當道。亦不能得。蓋其急于成功。以贖己罪。故他不遑惜焉。至是鑄錯無鐵。噬臍無及。可恨哉。方其迫寇金山。還師乍浦。百里而趨。蓬頭繭足。葛糲且不飽焉。乃復窮其力。以逞老馬而不顧其後。亦安能無路蹶之虞哉。比次孟家堰也。崎嶇凸凹。陣不能成列。兵不能轉刃。突如而來。地利已失。如之何其不北。是日盧兵奔澈浦。賊午後復至吾鹽城下。知不可犯。乃去。是晚丞林子士儀歸自乍浦。丞朱子光裕。尉李子茂歸自郡城。揮使劉子岱松歸自平湖。乃協力並守。巡督益嚴。嗣後惟開西門出入。諸水關皆瓦塹。軍民守堞如初。夜給以燭。間施升米之惠。置竹牌以避矢石。建蓬廠以禦風雨。修鞭銃火藥弓矢。以壯軍實。皆先後就緒。可裨實用。且則詣縣治兵事。夜則宿西城樓。視公廨若浮萍。鄉之民多襁負而來。城中亦無復謀他徙者。己卯。賊犯宋亭村。宰牛而食。庚辰。登秦駐山。辛巳。越澈浦。踰黃灣。至石墩巡司。及天妃宮駐焉。是日。又三百餘賊自淞江突入嘉善縣治。火民居漕舸。直奔郡城。又火六里街。值新募狼兵四百人至。遂合戰。敗之。斬首二十有奇。唯陳劉二公。郡以外其墟乎。壬午。餘黨從新豐太平橋出海鹽塘。望金山以去。而石墩諸賊遂盤據不動。中丞王公乃檄僉憲領兵羅公。盧張二參將。及周都閩應禎。督兵下屯海寧邑。庚寅。公單騎直抵邑中。懸賞罰。飭部伍。戒諸將以無忘此仇恥。經三晝夜。乃歸。辛卯。戰石墩。狼兵傷者數人。壬辰。賊掠黃灣。至天仙府高家橋。癸巳。轉掠談家嶺。裴家村。燬民居且盡。乙未。盧周部水陸諸兵屯園花鎮。崇教寺。賊掠黃灣西寺而去。又明日。轉掠紫雲村。一踪出西旱橋。一踪出黃山嶺。伏菩提寺。與周兵戰。誘至寺中。伏兵四起。周馬陷泥淖中死之。並殺其部下二千餘人。自是賊

益鷗張猗。晝則分郤四出。夜出復歸巢穴。據險乘高。立柵自固。攘金帛。汚子女。薄室廬。萬姓忿恨。無所控訴。諸官兵依遠觀望。以得脫爲幸。雖狼兵號稱悍鷲。亦莫敢彎弧爭死敵。每鄉氓自擄歸者。云倭人禿頭烏音。不滿二三百。餘皆寧紹漳廣諸不逞之徒。潛勾鬼蜮。竊據門庭。至莫可救藥。越五月庚子朔。賊復掠黃崗麥墩。端午甲辰。復報二百餘賊泊秦駐山鮮魚嘴。入姜家村焚劫。不移時登舟。爲水兵所逼。至西復棄舟。從談家嶺西鹽倉南投硤石。不與石墩合。蓋又一郤類也。乙巳。石墩賊薄海寧。盧兵出戰於二十里亭。不利而退。丁未。硤石賊犯崇德。轉至石門。石墩賊掠園花山。由腹裏至麥莊橋。戊申。掠九都大康橋。鄉有曹祿曹禎者。預集諸鄉兵。揚幟鳴金。若將迎敵。賊不敢渡河。余隨遣人賈旗匾往獎焉。匾曰保護鄉閭。將以風來者。庚戌。復犯澈浦。初欲奪兵船。不能得。卽進攻南門。午轉而東。三十人將弓矢板牕薄城下。餘劄立河畔。城上軍民奮勇協擊。銃礮矢石無虛發。傷二十餘。移時乃去。遂火總寨道院及民居。一望赭然。晚復歸黃灣。男婦奔逃。殺死者無紀。澈浦海鹽右臂。孤危尤甚。火具戎器朽乏不堪用。郡守公日遣人賈致。城之不爲狐窟鼠穴者。公力也。又有統兵揮使徐君行健。丞黃君鶴。尉李子在徐。勇略嚴明。能出死力。部下畏之。李屢隨征勦。氣壯而弗懼。亦簿書中之甲兵者。故保護無虞。然其勢亦孔棘矣。自辰至于申。沿塘閨靜。偵諜之卒不敢前。邑中皇皇。至於旦夕。辛亥。石門賊轉掠王江涇。嘉興子弟兵敗績。傷二百餘。乍後二所又報有賊自金山而南。僅十有八人。壬子。侵平湖嚴州守禦百戶朱某。追擊于新豐。死之。蔓延四五日。乃成擒。是日。大步山又有賊四十餘登岸。至城外朱家橋。至清風圩。淡井廟過河。宿三里橋。衆

皆謂賊少兵多。勦之宜。余私計日且暮。兵又非夙戒。出奚難。難於入。乃止之。越次日癸丑。乃邀丁總兵及李尉督杭湖衛卒勇壯千餘人出。追之。卽天寧寺禱祭。余與方揮使諸君舉酒誓祝。兵皆踴躍有生氣。余隨治糗糧。命小舟賫送。甲寅。追至嘉興郡。賊已先屯石塘灣。張參戎二千餘兵出拒。塘左右濼水。仄徑不可入。麻又蒼鬱。賊從中突出。張兵駭散。死溝壑者百餘。時我兵猶未至。比至則賊已東奔。入嘉善界矣。乃全師而歸。邑人猶恨不與決一戰。角生死。丙辰。石墩賊復出談家嶺。故爲復攻。激浦狀。遺竹梯灰石于道。以懼我。十八日丁巳。遂移輜重入舟中。揚帆宵遁。水兵四面縈繞。用發積大□佛狼機迎擊。丙辰。震撼之聲轟然。海上波濤爲之變色。詰朝戊午。獲巨艦一。斬首者二百有奇。溺死者無算。惟遺一舟。巨寇大慙。一朝殄滅。千軍萬姓。無不鼓舞更生。思磔其肉而飲其血云。是捷也。統領兵船揮使劉君隆。潘君昇。實綱紀之。千戶晏君繼芳。相左右焉。奮翼桑榆。過緣功準。亦不負肇創之初心焉。先是都臺兩院守巡兵憲諸司道。憤蜂蠆之流殃。悼虎旅之無烈。乃厘思遠略。廣募驍銳。命諸將分路夾攻。尅期並舉。又召戰艦悉集。激浦。預扼其歸路。至是果收此奇勦。爲東南樹保障。猗與休哉。嗚呼。劇寇方殲。別郇猶熾。吳淞之鼓。聲未息。平湖之舳。羽屢聞。極目關廂。風煙慘淡。顧瞻村落。鬼火熒煌。雖赤壁焚舟。幸假周郎之便。而殺函雪恥。猶切孟明之心。藉市井於戎行。未免驅羣羊以角猛虎。空陸營於北郭。尤恐藉寇兵而賣盜糧。民固若禾黍之望甘雨。天將挽銀河以洗甲兵。杜豐懷來。尙有資于羣策。竭力死守。敢自負其平生。謹敘顛末。用告僕夫。告捷後二日庚申。武原傲吏壺陽鄭茂撰。

按公守禦全我城社爲功最鉅家藏有此述每詢長老及諸世家卽此亦未有能知者可慨也余嘗欲白當道特建祠祀公不果至有謂舉名宦爲便余甚不然當自有說適閱此述命兒手錄示同志而固藏原本亦以存公之文學政事云辛亥八日朱元弼識

附全城志

朱士遷曰余爲兒時聞諸父老談鄭君侯禦倭事未嘗不涕泗交頤也瘡痍初起固宜感人爾矣及長而觀邑志往往抵牾史失求諸野人言可廢邪百年承平倭難陡發鹽邑之被圍也與郡城之突犯也勢蓋岌岌君侯與劉公稱守令哉人謂微二公必繼黃象諸邑不守矣郡人知祠劉公而邑於鄭公闕焉假令公功不然安得詣人口而一之豈顯蒙其心猶未離古邪乃今則否矣余竊感矣故不論鄭侯撫字他績而稍詮倭亂終始述爲全城志

倭奴自勝國時負其桀驁招之不賓國初旣降張士誠滅方國珍其餘燼亡入海者每誘島倭入掠以故洪武中竝海郡邑數中倭高皇特遣重臣視要地築城嚴防戍至著訓誠後世絕弗與通永樂初歸附許之貢已而復大舉犯遼左都督劉榮設伏擊之殄滅無遺論功封榮廣寧伯自是斂戢不敢爲寇海上熙宣而後遞貢遞掠反覆無常然所謂掠者小有抄盜不爲害也自宋素卿宗設稱貢爭長相讐殺於嘉靖間而寧波首塗炭矣繼以舶盜弄兵勾倭內向浙中騷動朝廷後先爲特設撫視中臺臣浙有巡撫始朱開軍府雖時有斬獲終莫能戢壬子遂犯台州破黃巖象山諸邑明年又破昌國臨山鄞衢至青村

南匯吳淞諸衛所焚劫慘毒視曩昔尤甚。夏四月移舟犯海鹽。直抵濱武場。我軍稍有擒斬。而邑中最號驍勇若毛堂、崔渭者。竟死于敵。未旬。他倭四十二人自金山登陸。過梁莊。殺指揮滿朝及千百戶王繼隆、楊臣康、綬等。突至海鹽。指揮采煉馬呈圖。百戶王相姚岑禦之。又死。乃乘勝長驅。由澈浦入海寧。遶會城。又戕陳指揮。而西搗新安。所向披靡。遇之男子膏白刃。婦女辱淫污。慄悍倏忽。朱般千里。至陪京守臣選材官。用大師董以魏公。邀擊之。亦弗利。賊由丹陽取徑而南。奄至姑蘇野外。迷失道。獲一田父。謬引入黎里。三面阻水。官兵因合蹙之。乃殲焉。田父亦糜。土人祠之。至今。又旬有一日。有五巨艦。艦可倭百。泊海鹽。龍王塘下。四出剽掠。五月之四日。復有艤艚三十五。裝倭千餘。至。與前倭合。進圍邑城。時濱海雖有倭警。殺將吏。然慄疾風雨。未嘗攻城。城圯弗繕。且未見大敵。上下惴恐。巡撫王公忬檄參將湯公克寬防守海鹽。爾時未而參藩潘公恩、僉憲姜公廷頤。又適在圍城中。湯公與之籌略。計畫軍民和協。悉力拒守。所攜驍勇絕倫。邳兵劉黑虎等分門睥睨。賊有緣城蟻附而登者。湯公手劍擊卻。會風雨。北城驟壞。尋丈。鄭端簡公家撤屋瓦塞之。甫竣。而賊獲鄉導。引至城壞處。得不陷。晝夜刁斗。凡五日而解。城外焚廬舍。伐林翳。係虜男婦。殺溺死者無算。金帛財物。輶載百里而內。村落爲墟。賊知海鹽不可卒破。乃悉衆北攻乍浦。不崇朝。陷之。邑之南又有澈浦。其于邑城則二輔也。於是海鹽益危。浙大震。事聞。眞守禦指揮王應麟于理。而褒恤死事千戶王鏗。是時倭雖棄去不守。猶出沒海上。烽燧時嚴。環海而聚落者。若唐家灣、長水灣、清水墓。皆去邑甚邇。荐被殘掠。湯公又以調出。城無大帥。人心皇皇。爭欲避之深山。廬市幾空。其冬。莆田

壺陽鄭公茂釋褐海鹽令。始至卽締閱城瑕隙。肯使加堅。俾無虞雨溢。又濬壕加深。而以其淤增築女牆。爲外衛。又做北邊制。於要地請各建敵臺。募勇健戍守。瞭望其中。令牽制賊不敢專逼城邑。人心恃以安。邑有倉。故在郭西。以儲漕粟。公謂寇一旦猝至。因糧城外。不易支也。敖倉卒駝。遂爲秦宋遺恨。矧蕞爾邑耶。於是亟徙粟城中。亡何隣倉民舍鬱攸。公徒步督救。遣屬僚城守以防奸細。倉得全。賊亦不得間。然後請之臺使者。并徙倉廩入城。明春賊大至。自燬其舟。勢張甚。男女耄倪幾數千人。襁負爭避。趨城。諸衛官恇怯。懾賊素。請公疾閉城。拒弗內。便公慷慨應曰。皆吾赤子也。何忍棄之。飽刃。吾自任之。毋恐。乃戒令掩東南北三門。獨啓西門。危坐。悉縱諸避賊者入。入且盡。門者請公曰。可已。甫扁鑰畢。而賊至西門。見我有備。氣沮。佯引去。公曰。是未可幸也。簡丁壯登陴。每堞軍一民二。編籍爲定。比屋更番。卽勢家無所徇。賊至則守。去則休。人爭效死。戒嚴月餘。公日夕乘城。臨機應變。百方捍禦。無孫墨守。或時微服巡行。獎勞扶惰。一衛弁小懈。必以軍法參治。不少假借。又衣寒者而食餒者。攬涕啣哺。士益感奮。賊驚悍無所施。倦而解圍。引其衆北向。將趨嘉興。參將盧公鏜。自川沙破賊班師。得偵候。捲甲疾驅迎之。遇於孟家壠。兵疲中伏。敗績。盧公僅以身免。從征本衛指揮李元律。杭州千戶薛綱。括蒼義勇劉大仲等。並戰歿。然而賊亦無意海鹽。轉掠入吳矣。乙卯元春二日。倭賊登白沙灣。屯柘林。亦自燬其舟。有沙賊千餘。由金山南來。適與之合。將入境。羽書劾午。故闔帥王國賢時在家。謂公曰。賊勢乃爾。如此孤城。何卽請援幕府。宜張倭聲。牒逾萬。庶得濟也。公笑曰。不然。夫倭僅僅數十。猶橫行江南。無能當者。若至萬。則省會爲急。豈遑及我。軍機何

事其可欺乎。必以實報。而公密飭健士三百。伏海塘蘆葦中。須其過。礮石齊發。鉦鼓聲動天地。倭賊大驚。亦有負傷者。遂奔突而南逸。出海鹽。由激浦硤石。抵省城北關。所過荼毒。一望煨燼。而撫鎮得海鹽警。遣都指揮王某率兵來救。遇賊於激之黃巢街。戰劬而死。當是時。江淮以南。瀕海無地非倭。而柘林賊最劇。五月。復沿海南掠。至硤石而還。道出鹽境。公第令堅壁清野。而整衆以俟。賊微知。往來去城不一舍。終不敢近。其冬十月。又有倭舟東來。泊秦駐塢。公與指揮徐行健密計。乘賊不意。卽日撲滅之。無遺。得首虜八十。督府特疏奇功。公與徐並蒙殊錫云。丙辰三月。柘林賊以乍浦新破。易襲。又趨圍其城。行健愈自勵。率兵往救。賊亦釋乍鼓而前。大戰於北王橋。徐殊死鬪。賊爲小卻。衆寡不敵。身被數十大創。竟死。陳中公得報。慟哭。以忠義獎吏士。期必剪倭而後朝食。人靡不奮激爭先者。賊聞之。宵遁。質明。官軍出不見一倭。而還。其爲賊所畏如此。自是不敢復窺海鹽矣。去之硤石。巢焉。分其衆犯嘉興。虔劉慘烈。松門指揮程祿以調至。逆戰死。嘉興地稍居中。民尤不習禦倭。郡守劉公懋竭力固守。城亦得全。又圍巡撫阮公鄂于桐鄉。逾二旬始解。賊首徐海。陳東。葉蔴等。盤據柘林。川沙。窪青村。陸涇壩諸處。勢甚猖獗。督府計調狼土兵將征討。絡繹過海鹽。而公糗糒供億。皆如挾纊。無憂庚癸。調度有方。又不至疲民。卒成王江涇京觀之捷。公有力焉。天子嘉異。徵拜兵科給事中。行之日。合邑男女。耄倪號哭攀轅。三日乃得發。邑志官績稱公。值倭寇擾境。盡力守禦。克完民社。又稱與太守劉公鼓舞協應。士民結心奮氣。董毅撰去思碑。稱公卻狂寇。全危城。而民以無恐。築戰壘。足兵餉。而守日以固。稍得其概云。明年。總督胡公宗憲。合兵縱火。掩襲巨寇徐

海陳東葉蔭於平湖之沈莊俱死。又明年計獲王直兩浙始寧。餘黨流竄禍在閩廣矣。



靖海紀略

曹履泰著

本館據別下齋叢
書本排印初編各
叢書僅有此本

序

馬稜謂虞詡曰。君儒者。當謨謀廟堂。乃在朝歌。吾甚危之。斯言誠不識詡。亦豈爲能知儒者乎。苟爲儒者。必明吏術。明吏術。則必辦賊。尹鐸只自任不爲繭絲耳。不知其能滅智氏。以爲民愛不叛。固然。然自其二年之前而已。知有沈城之事。銅出其墻。矢發於屋。非卒忽適然爲之也。天啓崇禎之間。置一曹方城于閩。同而閩同大治。當是之時。海寇颺作。壓城不摧。方其處之有如宿將。綸扇韎韐。迭御堂皇。轉箸五年。勦撫俱效。今讀其言。晝地聚米。應鏃投振。守距環脫。驅鈴役符。夫以韓白在壇。留泌居幄。卽多祕計。要其鑿然如斯而已。自是遂以召入禁中。計天下大事。連奏劾大將之否不律者。天下之人。益貴其識。皆曰使其乘樞坐籌。殺天下賊當盡。嗟乎。今日以譴去。聖人之治豪傑根本。漢高顛倒之而後盡其用。此豈可以一端見乎。我固嘗懷二策。未之敢獻。其一曰。今天下之賊皆庸才。奈無殺賊之人。其二曰。今天下之才足殺賊。奈無任才之法。撲賊久不滅。與其責將。不如責吏。用尹鐸一策也。激才久不出。與其求功。不如求過。赦魏尙又一策也。友弟倪元璐題。

子瞻氏有言。奸萌之始。以臺諫折之而有餘。及其旣成。以干戈取之而不足。噫哉。斯言。通治內于威外。方寓戎敵盜賊之患。以將帥摧掃之不足者。以長吏式遏之有餘。我國家鏡於治亂之原。內之臺諫與外之長吏。任寄出入。相埒並重。名碩勳績。往往繇此其選。當茲中外脊脊多故。凡今日長吏。皆將帥任也。能爲

將帥者。乃可爲長吏。乃可以重臺諫而有餘。我友方城曹公。在諫垣是能重諫垣者也。起家邑令。則在閩之同安。海內知公重諫垣。不知其重于令同。尤不知其重于能以令爲將帥也。閩海自中盜患。數十年。滋劇。同實海之喉吭。天啓崇禎之交。邑海患岌岌。幾以邑殉。則幾以閩殉。自公治同。五年。辦取一片。真膽略。真經濟。九弄而蠲承之。勦撫隨機。張弛盡變。獎率我閩。井保甲。悉成精卒。鳩集彼漁舟。買舶。盡爲戰艦。用戰。用守。用間。謀。用招安。用解散。用誘購。賊械百出。一一籌之以整暇。卒使三四渠率。順者搏頹。逆者獻馘。功成而全閩晏如。在事文武大吏。咸以戡定受異酬。獨公意色淵然。若不與籌海事也者。斯其爲卓魯者乎。爲頗牧者乎。公旣自以積望實入。冠諫垣。益發抒規。天下安攘大計。審諤不少。飢狗。屹然長孺。禁鬪。淮南寢兵之風。直以嚴冷孤峭。危身任怨。未幾得意。外嚴譴。噫。臣子分誼。譽懼功凶。何容避就。藉第令業躋清顯。宦海得失。稍稍易志。縱掖梧棲穩。又何以爲公。是當其治邑日。亦安能不愛官。不愛名。并不愛命。以爲閩海救甯此土也。期生忝公交盟二十餘年。素服膺公器識襟量。沉深而宏遠。方其籍孝秀淹公車時。已覘必辦天下事。惜也。試之令邑。能靖邑。以重閩。晉之諫垣。不得久諫垣。以重朝廷。風霜雨露。天心世道。未來夫安可量。公于此際。正益恬穆任之。吾儕蒿目時事。因得讀紀略而有慨于此。請以是編質今之爲長吏者。令盡如公。尙廛廟堂將帥之思哉。同里友弟彭期生題。

靖海紀略總目

卷之一

上周衷元按臺書

上過承山司尊書

上周際五海道書三通

上朱明景撫臺書十四通

上惲應原守道書

上趙芝庭按臺書

招回告示一道

安中左告示

安各地方告示

通詳寬限蠲免稿

與同年黃東崖書

與鄉宦黃元眉書

答張遊擊書二通

答何海防書

諭帖一通

卷之二

答衆鄉紳書

答何海防書

與李任明書

定商人穀價告示

上朱未孩守道書二通

示諭劉五店澳民

與顏同關書

守城議

上熊心開撫臺書并文移共十二通

上趙芝庭按臺書

上蔡五岳巡道書七通

上徐魯人海道書三通

答張遊擊書

與黃東崖諸紳海上近事書

答朱明景老師書

答葉慕同書

卷之三

上熊心開撫臺書廿三通

上蔡五岳巡道書七通

答王壯其府尊書

與趙副總書二通

上徐魯人海道書五通

上陸筠脩司尊書

上吳磊齋司李書

卷之四

團練鄉兵示

團練鄉兵條約

給鄉兵糧糗議

編造漁舟壯丁示

申報漁丁文冊

團練漁兵款目

會集協勦示

查申漁兵功次

行賞有功漁兵

請賑申文

勸諭捐賑

設法賑濟

靖海紀略卷之一

鹽官曹履泰大來著

年友 馮元麟爾弢 閱

宋 玫文玉

門人

孫枝灼調玉 輯
蔡國光士觀

上周衷元按臺

是時撫院朱如容名欽相

同安濱海。獨當其衝。自春及夏。海盜橫行。地方之被毒者甚慘。職所目擊而痛心者也。頃以招撫。聚千百狼虎於中左片地。淫人殺人。無所不至。地方哀號震動。告案盈箱。職委曲調停。未嘗敢以褊急用事。但細思之。新撫固可慮。百姓亦可慮。且更可憐矣。七月念一日。把總宋九龍有李念貞。傳三官仔毆殺劫掠之報。職已經通詳。今解海防。何同知研審。然此亦據武弁偏辭耳。至於既撫之衆。殺人無數。掠人無數。猶然海上劇盜情狀。纖毫不以上聞也。七月念三日。商民陳芳者。昔曾被劫於海洋。感賊不殺之恩。設席請柯愛等數人飲酒。飲畢。遂擁至灣民吳廷尙家。索取海洋票約舊銀。有舊稱總管金目老喝柯愛拿人。愛向前細拿吳廷尙之父。廷尙持棍格撻。打傷一足。餘皆奔散。各船保甲。見其鴟張。恨不能即食其肉。因而解

縣職恐不懲責。無以平衆怒。故撻之。平民莫敢保領。姑寄監候。謂如是。方可仰承上臺安撫至意。職豈以成心偏護良民哉。不意俞總兵隱此一段真情。以激撫臺之怒也。八月初三日。已蒙撫臺憲牌。著職究解。今將吳廷尙。柯愛各杖一。并解奪。法如是止矣。若別有苛求。非職之所敢聞也。始末情節如此。惟台臺鑒職苦衷。轉聞撫臺。將海上生靈悉歸衽席矣。

上過承山司尊

職受篆方數月。而海氛不靖。兵將股慄。以真翫惕而託之假張皇。如岌岌有不能旦夕保者。然密偵之。殊不然。楊祿。楊策。一無賴。蠢賊。夥不過以千計。船不過以十計。以我漳泉兩郡并力圖之。何難滅此朝食。所慮者。賊在於外。奸在於內耳。俞總兵腹中止有一許心素。而心素腹中止有一楊賊。多方勾引。多方恐嚇。張賊之勢。損我之威。以愚弄上臺。而轉勦爲撫。異日者。擔得之資。俞與素各各滿腹。便可了局矣。第不思此端一開。而海上劇盜獨一祿策也哉。聞風而起。謂作賊得財。并可得官。恐撫未有已時也。中左片地。將終爲虎狼之穴矣。職患在剝膚不敢言。而又未敢遽達之撫臺。以觸俞鎮之怒。伏望台臺婉曲轉聞。嚴飭兵將。壹意擒斬。以防其蔓。

上周際五道尊

諱應期

蒙諭僱賃商船。自是職切身之事。然即此一事。便同塵飯。敢爲台臺陳之。四月中。俞總兵自行封船十一

間有稟委邵縣丞封船已封一十五隻俱可載五六百石者何同知以船小不便衝犂必須二千外石者會令職僱賃徧訪諸溇無此大船卽有之亦不可得賃也大都商船覓利但知有利衝犂何事而樂於赴難乎且撫臺嚴禁雙桅巨船縱嚴責溇中無不托改造之說而引以自避者無米之炊巧嬾實難職非敢弛於負擔以虛台命也倘必須僱賃亦止有五六百石者在職當親詣諸溇賃之然聞有旋賃旋放惟賄是聞者原無進兵勦賊之意而徒剝商人之膏血資與狡弁矣惟台臺詳察而斟酌行之日所稟許心素今已見用于俞總兵矣素目下有稟帖來投以招撫自任其子基在監職曾取出面諭之令其父作速剿賊立功聞賊首楊祿向與心素爲心腹交其功萬無可成也

答朱明景撫臺

諱一馮
初到任

職以微材當劇邑且值多故之秋天實阨之兩年之內惟去春僅有半收夏秋亢旱一望皆赤至今年三月間纔雨鄉村艸根樹皮食盡而揭竿爲盜者十室而五不勝詰也去年撫賊楊祿等原係鄭芝龍夥黨祿等領龍銀備器械爲賊具及招撫之時則撇出芝龍龍之所以懷忿而甘心于祿輩也今龍之爲賊又與祿異假仁假義所到地方但令報水而未嘗殺人有徹貧者且以錢米與之其行事更爲可慮耳職以送考往府趙推官留閱府卷失事者曾不一報卽報亦非真至念五晚間蔡虛臺以手書見諭纔悉情形隨星夜馳歸備文申報自十九日至念六日事也職再理前事而詳言之陳副戎率船一百念隻抵銅山會剿盡行收入小港先自立于死地矣十九日因敵糧各兵登岸失于哨探賊初以二小艇假作漁人泊

近兵船。遂舉火。未幾而大艦齊至。彼乘風而來。此颶風而不能出矣。把總宋九龍被害。焚毀之餘。陳副戎止剩三十六船。奔入中左。念二日賊直抵內地。約有二百餘船。橫行無忌。其最毒者。徧搜各港民兵船。而一并焚之。以絕我追躡之具耳。數日之內。陳副戎與俞總鎮閉門不出。蓋亦不能出也。鄭賊對居民歷數俞負約之罪。必得楊祿。楊策。許心素而後去。其執說如此。至念七日。放回兵船三隻。聞賊與一武弁有舊。故以此市德。實非奪之而歸也。是日午間。賊聞外洋有番船。遂率諸船出外劫掠。而內地仍有賊哨。乘潮往來各港。令人報水。廿八日各港稍寧。漁民敢于出捕。鄉民攜入城者。漸亦還家。于是俞總鎮飛報在舖者一切撤回。其意未知何若耳。夫當此一無所恃之時。往來操縱。徒聽命于賊。而猶聞揜敗。以爲功。飾虛以爲實。將來之事。何以稅駕。如職一官。有何足惜。而海上生靈。真足惜也。伏望台臺威靈獨斷。調兵固守。早一日則早紓一日之憂耳。黃巽冲去年十二月間被擒。詰之。隨已脫逃。頃四月初。復密行緝究。業挈家下海。不可驟得矣。餘黨容職設法尋緝。另行申報。

上朱撫臺

鄭賊初四五兩日。大船陸續駕出大擔。意在劫洋船也。然內地有小船數十隻。往來哨探。初六日賊船二隻。突入亨泥港。紛紛報水。職帶領健丁百餘人逐之。擒獲六賊。初九日蒙巡海道竿其首矣。其擒賊鄉兵職遵奉賞格。當卽賞給。更加花紅盃酒勞之。各地方人心呼之立應。勃勃有方張之氣。皆台臺威靈所鼓舞也。中左城賊耿耿眈眈之。其意全在俞總鎮。以是總鎮急欲回泉郡。發足四五次。被賊窘逼。不能脫身。彼

向不愜于中左。且城中絕無餘糧。久而內潰。洵可慮耳。賊勢猖狂。援兵不至。職只有奉行鈞令。嚴保甲。練鄉兵。保守城池而已。庫藏如洗。巧嬖難炊。職勸諭鄉紳監生。及富民好義者。各捐資募勇士百餘人。以防守近澳。衆皆樂從之。楊祿與策。俱在許心素家。總鎮提之不出。聞心素招兵自衛。賊亦未能遽攻。是亦可憂之事。激之不得也。此中鄉紳議論。與去年大不同。以昔當全盛。今當潰敗。昔賊以千計。今賊以萬計。台臺無事不處其難。諸紳未有不攢眉而嘆無策者。百凡事宜。職敢不盡心以自爲計哉。嗣後消息。容職次第申報。

答朱撫臺

自初九日以至十三日。日日有擒賊來解者。鄉間人操利器。家有鬪志。神氣大振矣。十四日賊到五通地方。要登岸。鄉兵聚集數千搏之。賊各負傷而去。職召彼處鄉民。徧爲獎勞。令富者給貧丁以器械。幷助以飯食。賊至則合力追擒。人心無不樂從者。其有二三勾引接濟者。職已密訪捉獲。容確審申報。兩三日間。近縣內地。絕無告警。惟劉五店尙未靖。浯洲毒燄方熾。蓋內地無可容身。不得不轉而之彼也。同安各澳。職密搜之。其船可載八九百擔者。尙有堪用。有可載千五百擔者三隻。係豪有力所管。向避入泉城小港。職已發封條取用。但此船必須兵以守之。而以器械火藥衛之。乃可保全。非是而賊謀叵測。甚可慮耳。

答惲道尊諱厥

流賊登岸。職遵憲檄。竭力舉行鼓舞鄉兵。人有鬪志。賊亦畏縮不敢前。但近大海一二處。尙被其毒。蓋賊

倚海爲勢。追躡無從。不能如內地之易于捍禦耳。真賊日已奉命正法。梟示。嗣是陸續擒獲者。不及成招而斃。以鄉兵恨不能啖其肉。一成擒。便無復生理。況又加之以刑乎。以是未得申解也。近有勾引接濟數奸。卽當成招押解。以膏斧鉞。許心素逋逃之罪。必不容貸。而目下招兵自衛。窟穴甚固。激之仍還本來面目耳。賊勢不知所終。前後左右皆爲賊傳遞線索者。言之最難。容職伏謁之日。以陳其槩。

答朱撫臺

自梟示六賊之後。近地無賊登岸。惟劉五店與浯洲。賊隨意出沒。拿人報水不絕也。俞總鎮至同安。但閉門高坐。與之言則浮游支蔓而已。及彼渡海之後。賊數數至中左挑戰。而相傳以爲必攻所城。海道調兵往援。但苦單弱耳。許心素應誅。不待今日。今素與楊祿等。俱在充龍地方同室而居。招兵五百餘名。扃戶自衛。擒之亦不易。聞彼云。倘追之急。則有轉而從紅夷。是實話也。昨心素有到城中買米者。職緝之甚嚴。已將包修者。現在枷示。近日聞其窘手。又求接濟于漳矣。斬根除蔓。必須寬之使不吾慮。聲色不露。而元兇授首。乃是第一策。不然而激之生變。俞總戎愈藉以爲口實矣。伏惟尊裁。

答朱撫臺

紅夷船泊浯嶼。賊俱退至銅山矣。職細扣俞總鎮。渠云。夷之攻賊。確然可信。然聞賊與夷人往來如故。又事之不可信。不足恃者。楊祿今復出用事矣。黃贊卿係賊心腹。買小漁舟數隻。借哨探爲名。而時刻爲傳遞之計。數日內。網漁民廿四人。以爲賊也。竟解總鎮。漁民控縣。職卽轉申海道。職審而豁之。廿四人幾死。

而得生焉。夫通消息于劇賊。戮良民以稱功。議剿而可使此人在行伍中哉。其如有力庇之者。奈何。僱船一事。郡中一二十大老。以爲失人心。彼痛不切身。言之甚寬耳。使不僱而船能立辦乎。賊至而束手待斃乎。職奉憲令行之。各船戶歎欣趨事。何曾費其毫毛。蓋船戶至今日。亦知徧海皆賊。藏舟無用。而人人有義憤矣。人之爲是言。必感觸于一二僱募之不安者言之也。惟台臺斷而行之。若護船在兵。職已對總鎮言之再三矣。

招回告示

爲地方事。照得海盜橫行。所在焚掠。今爲劇賊。昔皆良民也。人非生而爲盜。一念之差。便爾失足。從正有路。要在挽回。今與爾諸民約。凡有子姪弟兄在海爲非者。著父兄叔伯卽去勸諭。歸家改過。便是良民。本縣樂與自新。既往之事。決不推究。且家園如故。骨肉團圓。幸天雨露足。儘便業農。爾輩倦而知還。回頭是岸。尙爲未晚。倘怙終不悛。無論將來沉淪苦海。卽在今日。爾輩從賊之人。本縣業已燭照數計。直待一一發覺。拘禁家。勸限招回。則一人從賊。全家落難矣。言念及此。各各猛省。及早招回。以保全身家。不負本縣撫恤之意。于計甚便也。本縣一點愛民真心。從無虛僞。素見諒于爾輩。決不誘以歸路。投之法網。其勿疑畏。因循規望。以貽後悔。特示。

上朱撫臺

近來賊以銅山爲穴。而招回者甚多。回本縣者。卽令編入家甲。禁刁徒之挾詐。以安其生理。地方亦覺寧

靜紅夷大船仍在洋口。前有烏船一隻來。賊以爲貨船也。而劫之。被夷人擒獲賊夥幾四十人。而其中賊首之精悍者。已賣與鄭芝龍。而所解廿餘人。大約被擄者居多。而俞總鎮且居之以爲功矣。賊有攜家小者。乃賊首。而小賊不能攜。近亦未之有也。黃巽冲妻楊氏。已獲。監候訖。令密信招夫回家。有親兄珠萬已同去做賊。其他則疎族。或不便於株連耳。

答朱撫臺

蒙台諭以夷攻賊。卽商之海道矣。職意呂宋助勦之船。來無可據。果夷賊自相爲難。亦聽其搏擊于外洋。不欲引之入內。恐驅狼進虎。且非法也。條陳之人。未可輕信。惟台臺裁奪。近聞鄭賊已據東粵之墩頭爲穴。惠潮之地。殺掠最慘。而風汛一便。此地又不知何如。俞總兵耽處堂之娛。甫云出汛。而旋已收入中左矣。洪都闖畢。竟見妒于主將。海道調之不得。事多牽制。不可圖也。王清與許心素結契。已坐心素之船。其船堅巨。果用之打賊。儘稱利器。卽結契何妨。但恐一入其門。無不柔之骨耳。

答朱撫臺

寇在南澳有陸續招回者。職著保長家甲。隨到隨報。拘同父兄與家甲。保領甚多。尙容冊報。勦之甚難。目前止有一解散法。職盡心圖之。但力單而勢孤。終不能副台臺之望。以是蚤夜焦思。而食不下咽耳。鍾斌突然而來。以求撫爲名。然不料修船整器。求無不得。又出自俞總兵之號令也。至今日而劫掠橫行。賊船已至四十隻。職稟海道急圖之。稍緩益恐蔓也。

上周際五海道

頃聞俞總兵遣奸徒李光、楊尾等載送千觔大銃計有陸拾門與鍾斌則其餘器械之精銳不問可知若令漁民五百徒手搏之能無糜爛之虞哉。哨官趙英亦慣爲勾接乃陳基茂之侶也。所舉洪頂吾輩想是引類呼朋而所云三事臨身則係實話。然此時之心亦不勝誅。或喚洪頂吾數人給示招回似無不可者。伏惟台裁。

上朱撫臺

洪都司之事一至於此非陳文燦收入舊鎮內港自處於絕地亦不至於此。然何以獨敗在洪陳也。職向云大將貪懦兼之忌嫉必不容偏裨立功。曾縷陳於台臺之前而不意其言之果驗也。台臺焦心勞思竟爲匪人所債殊爲可恨。然而徒憂何益。惟是從新料理調發將兵以掇倒懸。地方仰賴匪輕也。鄭賊尙未至。初五夜酉二從古浪抵潯美高崎。今在高浦坂尾騷擾。職督領鄉兵力禦之。想無能爲大害。所望援兵齊集。以助鄉兵之聲勢。不啻雲霓耳。

上朱撫臺

賊至中左登岸。迎敵者止有浙兵。餘皆怯走。無一救援者。以是潰敗。是夜二更。俞總兵越城而逃。潛抵同安城外。職已設計留之矣。兵船新舊被焚被牽。無一存者。民房燒毀。流離載道。目擊心酸。職一官何足惜。但思咽喉失守。全閩震動耳。目下團結各保。百計捍禦。所幸地方人心尙存信義。呼之卽應。然力單勢孤。

望救眼穿。惟台臺速調援兵。指授方略。以解燃眉。

安中左示

同安縣爲安輯地方事。照得海氛橫熾。流毒萬民。俱繇本縣綢繆失策。負慝傷心。萬無可解。但本縣素與爾士民相信。自揣豈非我召。所恨力有未逮。不能出之湯火。而一點血心。枯而欲裂。我百姓必共知之也。聞此數萬豺狼。亦素知本縣治行。頗切歸向。卽此良心不泯。自宜引衆退避。且中左一城。斗大。百室馨懸。豈云財賦之鄉。必非垂涎之地。爾百姓各自安堵。目下援兵卽至。上司軫念甚切。誰非胞與。其忍眞一隅于度外乎。本縣從爾耆老之請。不難單騎而來。第所城縣治。各有職守。勢難擅離。姑發一示。與衆共曉。凡城內外居民。同心協守。毋得驚竄。以貽伊戚。

通詳寬限蠲免稿

看得同安縣僻處海濱。山多田少。素艱粒食。兼之兩年荒旱。頻仍一望焦土。民困極矣。且頃因海寇結夥。流突內地。如沿海活洲。烈嶼。大燈。澳頭。劉五店。中左等處。焚掠殺傷。十室九竄。流離載道。加以今冬不雨。二麥未種。百姓益惶惶無措。睹此淒慘景象。眞令人涕零心裂。欲身代而無從者也。今據閣縣士紳一呈。委係流民圖繪。痛在切膚。但查本縣庫藏若掃。賑無可賑。錢糧催檄如羽。蠲無可蠲。而所可微潤。以蘇涸轍者。止有緩徵之一法。如七年額派軍糧兵餉。原奉憲檄分限。按季徵解。冬季應完五分者也。今求暫寬二分。候明歲春夏有收。并限追補。庶上有寬徵之惠。而民紓剝肉之苦耳。至於魚課額銀三百餘兩。渡稅

額銀四十餘兩。徧海皆賊。民無片帆。可以往來。商販生理斷絕。錢糧何辦。合應題請暫蠲一年。以延海濱殘喘者也。本縣獨當災傷之衝。別縣自難引例。惟望破格揀援。以道參罰。合就請詳。

與黃東崖同年

昨入郡劇欲晉晤。以地方告警。匆遽南還。不及登龍爲歡。弟以縣質而當衝險。岌岌幾不自保。所恃小信小惠。以鼓舞鄉兵。自深青以至近城。以萬人計。人人奮勇。殺賊無數。庶幾有臂指之勢。然而枵腹空拳。事總不可知也。陳熙老招安之議。造福固匪淺。然聞賊望甚奢。何以結此局。反覆思之。真食不下咽。而寢不貼席。終未敢贊一詞也。

諭鄭芝龍

本縣生平心事。以真實待人。並無一點浮游。真可以對天而質人者也。矧有地方之託。稱民父母。其肯改素心。而以虛誕從事。蒞同以來。已更四歲。其爲百姓所知。不待言也。屢閱來揭。爾爲俞總兵所激。本縣亦已詳悉。爾果實心效用。芟除夷寇。地方享一日之安。豈不甚願。但事有不可爲者。如爾所稱水操遊擊。此朝廷選授之官。非撫按所得而主也。譬如府州縣令。撫按得而薦劾。非請旨。撫按不得而陞降也。今爾求之不得。輒思自泉而興而福。一路騷動。何所不爲。然有害於無辜之百姓。無益于一己之功名。且愈決裂。事愈不可收拾。益非所以自爲地矣。爲爾之計。只宜解散。立功將來。前程自不可量。正不必一蹴而求顯榮也。予爲地方父母。故以忠言勸勉。其清夜思之。毋忽。

上朱撫臺

自俞總兵棄城而逃。往漳之後。外迫于賊鋒。入中左不敢。內迫于衆怒。棲高浦不得。乃往深青四五日。旋至同安歸府城。稱病杜門。信如台臺所料。并不能了撫事也。兩道議撫。而屢遷其說。蓋賊之志驕而欲奢。亦知必不可從。而揆情度勢。萬不得已而爲之。此非職敢出諸口者也。同地自深青以至芎溪。五十保鄉民協力。團練以萬計。有賊至。不呼而集。聲震如雷。殺賊無數。不待賞亦不勝賞矣。近城三十里內外。賊亦相戒勿犯。如此氣勢。一隅可恃以無恐。然此皆鳩形鵠面。家無一粒之民。兼之荒旱爲殃。又可慮也。捍禦之策。伏候台示。

上趙芝庭按臺

諱允昌

昨蒙憲諭。隨卽細叩諸鄉紳。曾否以遊擊許鄭芝龍。諸紳力爭其無。而原東則無可索也。職聞撫議已定。而所以撫之者未定。昨俞總兵差人賚劄。令其散黨。而不言何以散。復差官往撫。而未知何以撫。非台臺威斷並行。毅然主持于上。不幾于道旁築舍乎。

安各地方示

爲休息地方事。照得海波不靜。兼早魃爲殃。百姓惶惶逃竄。饑殍相望。本縣恨不能身代。今上司甫議招安。毒螫已斂。而甘雨下降。正值農工告急之時。切身之痛。少紓萬一。爾百姓各自趁雨力田。不得紛紛搶攘。凡縣間詞狀一切。暫緩審理。差人下鄉騷擾。卽稟究責革。惟是上司批詞。一二關係重情者。勢不得久。

稽爾輩速自赴縣審結免致差擾困疲之餘合當安息爲此特示

與鄉宦黃元眉

去冬曾脩尺一申候想已塵台覽嗣是時事日非自貪懦無恥之將養成癰疽一朝而潰有言之可痛可涕者十二月初間鄭寇復至中左將逃兵散船器俱爲寇資所城若累卵而縣治亦皆震驚所恃平日區區小信團練鄉兵一呼而集奮勇格鬪者數萬人殺賊無數賊是以相戒三十里之內莫犯而內地俱得無恙然沿海一帶鞭長不及受害竟無了日且賊已舍此而挂帆北上其毒謀有不可言者兩臺從郡中公議不得不議撫今已斂螫而將來正未可知同地西南一角悉爲犬羊狼虎之場不肖徧體芒刺眞食不下咽而寢不貼席者也台臺其有以教之不啻苦海之慈航矣泰迂拙廢人于地方無益特以百般勞苦頗見原於兩臺而風波難測所恃萬閩鴻庇有天上貴人耳

上朱撫臺

職生不逢辰師旅饑饉頻年不解深慙補苴無策幸藉台臺切如傷之豚百方捐賑加惠窮民此從來未有之德意也職所請倉穀已蒙批允隨即于十一日招集饑民在梵天東嶽兩處給散每日約有五六千人日每人給米四合蓋煮粥則強弱凌奪有不食者而散米則雖極老極幼極憊之民無不均足此職躬親區處有法以行之俾人人得以食台臺之惠者也西界有麥可食尙不待賑若東界則近而馬厝巷遠而活洲職定于數日內親履其地查真正貧戶而高下與之務期沾被必不使徒有賑濟之名耳鄭寇解

散。終不可問。目下約有萬人未散。昨有一稟致張輔吾云。曾窺見文移中。有借撫爲勦等語。衆皆疑貳。職以爲當此之時。未應使之疑也。職旬日之間。只行賑濟一事。而未撫時之戒備稍弛之。彼意全在偵職之動靜。以爲疑信。不如此。不能堅其信也。此時以此法聯絡之。或可收之爲用。或可徐起而圖。著數皆未可定。審局全憑在我。庶幾于聲色不露之義有當乎。不然而不密害成。有不忍言者矣。何同知十六日往中左。調停其間。至誠足以取信於彼。或者不虛一往耳。此就撫事而言也。職又有憂焉。十五日曾令人往中左密訪。有陳衷紀、李魁奇各懷異心。船隻叛出者三之一。糾結積盜李梅宇、陳盛宇等。勾引紅夷入內爲難。其說不知真否。若果然。則中左竟爲戰場。同邑彈丸。不危若累卵哉。台臺何以教之。

上朱撫臺

中左撫事。俱何海防肩之。職所以不越俎料理者。正欲力持法紀。使彼知憚而詳加商榷。以萬全望海防。則職蚤夜關心者也。近何同知云。船器分撥。已有頭緒。議留之兵。俱經點過。但又云。狎獐之狀。驕蹇之態。目不堪睹。則狼野噬人。時時可虞。非有重兵以彈壓之。其變將不可測。望台臺爲善後計。庶於此局稱完耳。

復張遊擊

途次相晤。匆遽未盡欲言。歉歉不佞。昨往莆陽謁朱道尊。諄諄以撥還船器爲第一義。今未知其作何分撥也。便間幸以見示。聞黨衆未散。且李魁奇之橫。卽芝龍有未能約束者。然乎否乎。志大者不惜小。芝龍

今日益不當與雞鶩爭食矣。麾下其開諭之何如。諸事以速爲貴。遲則葛藤愈生。亮高明之所洞悉也。方之驥母及壻已召保縱還。受此上臺鴻恩。何以爲報。不佞有數語諭之。詞義俱嚴。想已悚惕。總之前爲法外之人。今爲法中之人。自須盪滌腸胃。打起精神做事耳。

上周際五道尊

中左撫局幾債。止因陳冲紀從中挑煽。今被芝龍掌家手刃。附冲紀者。俱已鼠竄。可見芝龍報效一斑。差快人意耳。但查船器。堅好者竊之而逃。所存僅十之五。亦半屬不堪者。常聞芝龍亦自流涕稟訴防館。所恨冲紀之死不蚤也。日來高浦所叛撫者。駕船出海。仍復勒人報水。職密訪賊船所泊之處。令十八保鄉兵擒之。火其船四隻。生擒擊殺者纍纍。職星夜率鄉兵直搗其巢穴。衆皆受縛矣。各澳叛撫流劫者甚衆。澳民合力擒殺者亦多。即日當備文通詳也。

答何海防

聞銅山蟻聚。不滅於昨年。而石湖焚劫。又已見告。將若之何。此日正芝龍報效之會。豈得泄泄聽之。職早已稟撫臺請兵擇將。兩日內當有消息。各鄉兵之擒殺叛撫者。不一而足。最快者是劉五店背水一陣。火焚水溺。以百餘人計。即日備文申報也。

答張永產遊擊

叛撫之巨魁已殄。具見以賊攻賊之一斑。亦麾下鼓舞之力也。大教云。危疑洵洵。此又從誰生。叛者自叛。

順者自順。各占地步。正不須黑白眩亂耳。漁人水戰火攻。萬目所共睹。絕無可疑。永寧告警。戰守茫然。請兵分駐。麾下先得我心矣。

上朱撫臺趙按臺

惡生林獻采。造孽多端。而挑夷勾賊。其滔天之罪也。向奉憲諭擒拿。因賊勢未殺。急擒之。恐以激變。以是優容至今。今已熟之矣。仰仗台臺。卽賜斧殛。以除此狼。庶幾懲一警百耳。

靖海紀略卷之二

答衆鄉紳

不肖秦迂拙成性。受事以來。獲戾於長者。指不勝屈。函冒之恩。豈不知感。若林獻采一事。上臺久已屬意。昨特借此以餌之來。今果投網。想人怒天譴。斷斷有不容逃者也。不然。以青衿而妄意塾釋之乎。惟諸台臺垂鑒。宥其愚戇。拜生成之賜。侈矣。

答何海防

職仗台臺之靈。多方料理。少偷處堂之安。感庇匪淺也。但昨道尊所發審撫賊蔡明等七犯。語語吐自肝鬲。且覆口相同。劫掠米船。萬無可疑者。此必出於鄭芝龍所不知而後可。如果知之。而有此舉動。奈何言撫也。三尺具在。職不敢私。豈偏與之爲仇乎。此後鈴束倍常嚴密。煩台臺申諭之。

與李任明

諱傑然。係前令。

秦材本鷲庸。地當衝疲。百凡苦趣。爲令者所甘受。且台臺業已身嘗。無煩秦蛇足其舌也。獨至今日。更有可駭可愕者。連年荒旱。斗米二錢。而大寇連鯨劫掠。丙寅春夏之間。朱如容撫臺議撫。而俞總鎮助寇養亂。與不肖意見相左。幾爲其所擠。幸按臺周衷老力持之。而失意之中。番成得意。此夢想所不到者也。丁卯四月。鄭寇躡入。烽火三月。中左片地。竟爲虎狼盤踞之場。七月寇入粵中。九月間。俞將又勾紅夷擊之。

夷敗而逃。鄭寇乘勝長驅。十二月間入中左。官兵船器俱化爲烏有。全閩爲之震動。而泉中鄉紳不得已。而議撫數月之內。斗大輪山。曾無一兵之援。斗糧之給。祇有鼓舞鄉兵。一呼而千萬人立應。與賊格鬪。庶幾有以奪其膽耳。近雖云撫而數千劇盜。蟻聚鷺門。將來竟不知作何結局。守土者但知有守。聯絡衆心。共圖捍禦。職之事畢矣。近有惡生林獻采。勾賊劫夷。撫臺嚴令緝獲。不知其爲林亨萬中表弟也。以是開罪垢辱。已甘蒙面。風波恐在轉眼。亦聽之而已。台臺更何以教之。

定商人穀價告示

照得閩地穀少人稠。專取資於粵。商人揚帆而來。倍獲而去。則不惟閩資粵。而粵亦資閩矣。向因廣穀不通。以致價值湧貴。今鄭芝龍謾送穀船。專以救我同民。乃奸牙捏商。搆勒高價。數日曾無交易。是乘我之急。而要之也。殊非商民兩利之意矣。今本縣就中酌處。每銀壹兩。定穀鄉斗一石七斗。商人利已數倍。而我同民庶幾少有旦夕之需耳。如牙行貪壑。猶然未填。故意與衆爲難。訪知爲首之人。定行重責枷號。此時悔之。甯有及哉。潮人同人。均屬一體。惟爾輩量情通融。毋致彼此參商。本縣之心安矣。

上朱未孩道尊諱大典

林獻采惡跡素著。今春海上劫夷勾賊。更關地方安危。撫臺得之採訪。嚴諭密拿。勿令逸走。乃二月間事。職但知此惡之不易擒。而竟不知其爲林亨萬之表弟也。被獲之日。亨萬差幹五六至縣門內。拿差役到家毒打。始之以板。繼之以棍。偏身幾無完膚。職受此辱。豈能一日苟留哉。正將申文函請罷黜。而以各鄉

紳與百姓痛哭流涕。遂爾轉念。且時方多事。不敢借此抽身。以負上臺壘培盛心。此職一點血心。絕無一毫粉飾者。也。職細思之。海上寇至。則束手無所措。奉憲緝獲。又南陽不可問。左難右難。卑官鷄肋。有何足惜。所可惜者。封疆耳。非仗憲臺力爲主持。將來之事。益不可爲矣。

上朱未孩道尊

鄭芝龍驚惶不定。一則憂新撫臺之到。撫事不就。一則憂陳盛宇與周三合黨夾攻。勢孤力單。性命不保也。至於賊夥流劫。到處生事。非惟芝龍不能約束。卽儼然一將官。亦苟且阿附。曾不敢發一令規正之。其行事已爲賊輩所輕。枉己直人。萬無是理耳。台臺必風聞其槩。職不能爲之諱也。前月念一日。有劉五店小漁船四隻。至古寧大洋捕魚。被賊擄去船一隻。魚船歸報本澳。次日。約會漁民。駕船三隻。扮作客船。到前日被劫洋中。賊果駕小艇四隻。將船鈎住。行劫漁船中埋伏之人。執械齊起。兩賊艇逃去。兩艇之賊。赴水溺死。艇卽舉火焚之。正在鬧嚷之時。適有宋輔國。乃鄭芝龍之家長老。自石井回來。望見焚船。以爲賊也。揚帆直衝魚船之人。又以爲賊夥之再至也。并力格鬪。此衆彼寡。力不能敵。魚民將宋輔國等十五人盡殺之。此時並不知其爲輔國也。彼此對壘。勢不兩立。亦迫于不得不然。萬無抵償之法。張都司危言恐嚇。職姑應之曰。自當究處。刻下且拘漁民一審。意欲將三四爲首者暫羈之。以塞撫賊之口。亦一時權宜之計也。芝龍揚言率衆賊報仇。職語之曰。如芝龍靜聽處分。乃不失爲撫。若果有報仇之說。仍是劇賊舉動。且我百姓。豈得束手待斃。卽令澳民合力齊心。以防不測。而澳民知是騎虎之勢。公然有鬪志矣。查劉

五店壯丁不及千。連結十三保之衆。則有萬人。團練之法。不讓十八保。料鄭芝龍不得與之爲難也。職對澳民諄諄開諭。事體如此。悔不得。怕不得。爾輩有何難免之罪。縣官決不庇撫賊。而仇良民。速來赴審。不可逃避。澳民亦各點頭。但職愚弄撫賊之意。可由而不可使知耳。職狂瞽之見。其於時宜理法。不知何如。惟台臺開誠見示。

示諭劉五店

爲地方事。照得沿海居民。以採捕爲生。自海氛不靖。我百姓生理日索。計無復之。一年于茲矣。近大寇業已稍解。而小寇竊發。漁民受其劫擄。爾劉五店駕船出海。爲勦除之計。不謂宋輔國之船相觸。彼此認以爲賊。而輔國寡不敵衆。一船十餘命。或溺死。或搏死。殊足稱冤。然爾輩實不知爲輔國之船。而故殺之也。此段真情。官府所諒。聞爾輩驚惶不定。訛言鄭芝龍率衆報怨。不知芝龍業已爲官。報怨原非官法。真心歸順之人。定不出此。爾百姓靜聽上司處分。不得日夜惶惶。以誤生計。但賊夥流劫。不一其類。卽如初三夜。黃宜仔。王孫治一夥。搶奪爾船隻。殺傷爾父兄。不軌之徒。且暮難測。爾輩會同十三保團練守禦。自是各保身家之事。遇警擒獲。固不得懲噎而廢食。分別好歹。亦不得恃衆以凌寡。此後凡有被執者。赴本縣審明。以憑法處。不可擅自搏殺。至于臨陣對壘。彼此勢不兩立。又不可取必于生擒赴審也。本縣念切民隱。爲爾謀。甚于爾自爲謀。爾百姓其各遵守毋違。

與顏同蘭

近來兩臺議撫有疏。海氛少靖。而中左片地。尙爲犬羊蹂踐之鄉。未知當事者作何安頓。此輩肆毒于地。方其怨不可解。調劑殊費苦心。且有借撫以作賊。此撫而彼叛。勢不得不用芟夷。而芟之則無一兵無寸鐵。不過仍用吾父老子弟芟之而已。所幸上臺見信。殲殺無數。而鼓舞不倦。卽有一二不擔事者。從中股慄。而職擔之。以爲無他變故也。撫賊于是戇而定。且爲吾用。而擒賊報效。目前亦儘可觀矣。其後來變態。則不可知也。幸有以教之。

一守城議

自去年海寇焚掠中左。各處流突。本縣彈黑孤懸。並無一兵之衛。岌岌幾于不保。該縣日夜登陴勸諭。鄉紳士民。稍稍溫飽者。各出家丁。多寡有差。每夜上城支更看守。一切販鬻貧民糊口不給者。免其上城。于是貧民感德。卽一二無賴不軌之徒。亦俛首嘆服。雖警報屢至。而安堵無諱。

上熊心開撫臺

諱文傑。初到任。戊辰之春。

中左之去縣城也。不過六十里。自去歲十二月潰敗以來。已踰半年矣。無將無兵。而西南一隅。竟爲犬羊虎豹之場。職拚此一身。以與賊對壘。而此賊之變詐。未可以常情測也。始而挾撫。繼而要割。又繼而擇官。眞如驕子之子慈母。求之不得不休者。職孤城逼處。止恃陸地鄉兵與之抗殺。僅延旦夕之命。而海上毒燄如故也。自泉紳議撫。而旣撫之後。就撫者。猶然番服包紅。露刃殺人。叛撫者。盜器盜船。劫掠四出。澳民撲殺之。不啻數百。賊口口糾衆報怨。地方惶惴無措。職大言以恐賊。曲諭以安民。乃不至于激變。而其禍

正醞釀未已也。近日之劫財殺人。未有不自鄭芝龍之散夥者。迅執之則得矣。少緩則逸而走。鄭寇爲窟。鄭寇非民非兵。不隸于有司。不轄于遊寨。職旣不便于行移。又難于勾攝。將奈之何。且此地受其荼毒者甚慘。家怨戶仇。面面相對。令此一方百姓。與之絕無芥蒂也。最難而職之調攝其間也。最苦。卽鄭寇果肯立功報効。而此地必非久居之所矣。且也人聚則易譁。撫之必當有以散之。或南路、中路、北路各處調發。黨與旣分。邪心自息。効用自當倍奮耳。細查兩月之內。夷船屢進屢退。不可方物。鄭寇乘吾內地之空虛。而陽爲恐慝之報。陰結腹心之歡。欲問之而有不可問者。萬一拴夷構難。空拳無應。爲毒滋大。同邑爲泉南門戶。關係匪小。職能禦之于山陸。而不能禦之于風波。非選將練兵。急爲補球。海上之事。不知其所終矣。迫切之極。忘其縷續。伏惟台鑒。

上熊撫臺

近日海上流賊。奪船出洋。朝暮劫掠。活洲渡載之處。又紛紛見告。率皆中左未散之夥也。今日中左並無一官。卽諸寨之中。有官而同于無官。鼓噪者不問。逃出者不問。法紀至此。已蕩然無復少存。何以致之。總之。將官苟且貪昧。有以招之侮也。爲今之計。急欲得賢將。而賢將安在。又無如急練兵。而老弱者不可練。將汰而招之。沿海皆賊也。招賊以爲兵。誰別其非賊者。此又難之難矣。職蚤夜思之。但見瘡孔百出。而不知補。據何從。惟台臺有以教之。

上熊撫臺
李魁奇與鄭芝龍同夥。因分賊不均。魁奇叛去。乃戊辰九月間事。

李魁奇奪駕大小船百隻住泊中左外較場招聚賊夥三千餘人矣。職令各鄉總督率鄉兵數千人于要路堵殺。賊不敢登岸。初六日。鄭芝龍自劉五店而往石井。招募鄉兵數百。借本縣船五十餘隻。以爲剿叛之計。初八日。芝龍封銀二十兩與劉五店澳長高大藩。要募鄉兵五百名。職令大藩還伊銀。答之曰。汝輩真能發憤勦賊。鄉兵自當助一陣。何須銀爲。以是芝龍感激激思奮。膽氣甚壯。初九日早。芝虎先駕石井魚船至中左。魁奇聞風而遁。今已退出活嶼外洋。早晚間芝龍聯結劉五店漁船。卽至中左矣。叛賊黨內有與芝龍密者可爲內應。且郭芝葵大發懊悔。此中機括甚可乘也。職思之。芝龍與魁奇萬無復合之理。撫魁奇不如助芝龍。若得成功。便可入告。不成。乃若輩自相煎熬。我可以享漁人之利矣。

上趙按臺

撫寇自春徂夏。叛服無常。其力盛。其志驕。其謀詭祕。而不可方物也。惟是與吾民爲難者。吾民能抗之。幾經挫折。而稍稍斂戢耳。然中左彈黑。悉爲虎狼犬豕之鄉。其衆尙以四五千計。求所以解散之而不可得。蓋隣郡之人。主于殺賊。但不能殺對壘之賊。而專殺受降之賊。以是阻其歸路。而止以撫賊爲窟穴。戀戀于中左而不能去耳。目下賊夥蜂起。而泉南重地。竟無一將一兵。以爲自固之計。若將以海上擔子一肩。推與鄭寇者。而鄭寇烏盡弓藏。輔車相倚之說。胸中未能卽破。非威惠久孚。彼豈肯窮追直搗。以爲立功地哉。職勢在剝膚。蚤夜思維。未知補救。惟台臺明以教之。

答項元海

弟三年以來。日與賊構難。去冬以及初春。尤大費撐持。四五萬之衆。蜂擁治疆。大將逃矣。偏裨擄矣。日兵抱頭竄矣。弟惟是率父老子弟數萬之衆。以撲殺諸賊。賊於是相戒。勿犯同城。而四郊稍得安堵。即今春招撫之後。驕賊之氣。尙未肯降。弟率鄉兵。有犯輒撲之。地方同事者。爲弟股慄。弟曰不然。必如是而就吾撫者。可爲吾用也。而撫衆於是遂定。今且知報効以自贖矣。此皆弟一片血誠。素信於下民。并見信於上臺。率意行之。幸免於罪戾耳。若宦舍蕭然。原是書生故我。弟每作書寄親識云。他人做官帶金銀回來。我做官保全性命回來。便是鐵漢。今日諸上臺。亦以弟爲正人。庶幾無負于大君子之教。足以慰萬里之相思者也。來教情形危迫。不異于弟。以義揆之。天之所以擁護有道仁人者。定是不爽。毋容攢眉也。

上蔡五岳道尊諱善

勾引紅夷者。職素廉其人。而雄長無過于許心素。其族許心旭。乃心素之堂弟。心蘭之親弟也。俱係勾引巨奸。但目下奉撫憲牌。追心素。心蘭賊銀五千兩。職方百計以誘之完。若卽行拿究。則被拿者不肯協助完賊。未拿者祇有抱頭奔竄。而職無可措手矣。或俟追賊將完之日。擇其尤者而治之。庶于事稱便耳。又蒙台諭兩驛錢糧。其苦未易以一言悉者。大輪一驛。受中左之累甚大。始以紅夷。續以海寇。上司往來絡繹。而總兵參遊之答應更繁。數年以來。膳夫逃。膳馬倒。驛官終日泣訴。要逃不得。求死未能。二年差銀已透支五百兩矣。刻下透無可透。將來竟不知所終也。至於深青驛。則不可以大輪驛比。無中左之累。而祇應漳潮之使客。膳夫膳馬。業戶具在一月之內。應付幾何。餘皆安枕食糧之日也。安得照大輪必求按

月領銀乎。且今年站銀已發四分之三。所未發者僅一秋季。目下徵比卽當給耳。大都過往者。需索無已。而驛官以縣官抵塞。一種苦情。非奉明諭。不敢縷縷瀆瀆也。勾夷姓名。先以所知五名開具。并祈電覽。

上蔡道尊

撫賊李魁奇等。蒙鈞示弔點。鄭芝龍三次弔取聽點。魁奇等抗不進城。芝龍心疑有變。遣往石湖一視。而魁奇等將船盡行駕出矣。意欲先至中左。搶奪芝龍之資。而芝龍從陸路馳歸。初四黎明到中左。將魁奇等家屬拘入城中。其居魁奇等船。初四午。方知聞芝龍拘留家屬。撫賊一半在船。一半登岸。燒毀較場諸舖戶。搶掠財物。芝龍僅有兵六百。脩整軍器防護。其中情態。總不可測也。賊船泊在中左。如此事變。將何結局乎。職差人偵探。所聞如此。

上熊撫臺

近探得李魁奇船泊銅山。船上賊衆。凡係鄭芝龍親兵。槩殺之。非賊無此辣手。非賊無此慘報。亦足明天道之不爽矣。郭芝葵相傳已被魁奇手刃。緣郭芝蘭逃回中左。疑其與芝龍爲內外應援也。信然。則賊種相殘。頃刻立盡耳。何足慮哉。鄭芝龍募兵千餘。不惜厚餉以養之。以急急造船繕器。彼急于自衛。而我亦與焉。刻下地方可無虞也。職向謂芝龍大病在驕吝二字。經此一番。可以鋤驕。可以破吝。而今而後。庶幾可驅駕之矣。若其真情。原不可測識。但芝龍好與豪門貴客。酬酢往來。沾沾自以爲榮。已大費鐵炭。今日腰頂俱黃矣。肯一旦輕割之。而有他腸乎。況寇仇在外。耿耿視之。至今日而門路已窮。卽欲不歸漢。不得。

揣此情形。職所以謂應助芝龍。而恩威操縱。隨時變化。台臺自有妙用。非可一格拘也。聞張都闖與芝龍最善。魁奇叛後。芝龍見王糧館。氣象行行。言皆脩飾體面。及見張。則失聲大哭。此足以見其真肺腑矣。今日芝龍之事。竟責之張。都闖可也。第各寨遊處。處處殘毀。整頓不能一蹴而至。令芝龍有以窺我之弱。而肆其傲。多方要挾。終是可憂耳。

答蔡道尊

同安各澳漁舟。不皆可用也。精銳直前者。止一劉五店三十餘舟。七百餘丁耳。卽處處編成隊伍。亦非可以隨意調遣者。至于商船大者。被賊燒毀數翻。已無剩板。僅存者每澳數隻耳。澳册上有有名而無船者。蓋船毀而餉存。挂一空名。以迫之完餉。職每一徵比。方惻然動念。媿汗滿身。又何從而編成隊伍耶。且此所存之小船。商民藉以糊口四方。朝東暮西。往來無定。非若漁舟之採捕。各有定處。可以一呼而集者。卽編之。似亦無濟于緩急耳。助魁奇叛者黃巽冲。止有一親兄。前被鄭芝龍戮于中左矣。其他疏族。不關痛癢。無可監禁者。密擒一著。去年屢試之不效。正苦無得力人。且此時賊之叛志甚堅。必不肯爲我而下此毒手也。相機觀變。倘有一得。自當仰佐高深耳。

答蔡道尊

漁船册尙未編成。同安澳多而路遠。且此時出海採捕。不在澳者居多。一時難以取辦也。昨蒙撫臺憲劄。其意急於至海上。謂須壯丁數千。船數百。皆不易承當之事。職以精銳千人應之。船則止二三百擔漁船。

數十隻耳。至于商船。則寥寥矣。以被火三翻。十不存一。與晉南惠之未經殘毀者。不可同年而語也。近日私販之船。細訪之。杳不可得。蓋寨遊不能拿賊。而能拿私販。即有好商。亦股慄而不敢出矣。鄉兵似不可另編冊。其赴鬪全在地方官之鼓舞。真如臂指之使。一毫勉強不得。一編冊。則人皆疑畏。以姓名一入于官府。而號之爲兵。其身恐爲官府有也。愚民意見固然。職姑與相安已耳。台臺以爲然否。

上熊撫臺

叛賊李魁奇與陳盛宇、周三、鍾斌等。聞已合夥。然其心參差不一。合亦速離。其間有可乘也。昨聞魁奇投稟于南澳鄭參戎。有投降之說。又聞欲縛周三、鍾六以獻功。賊態變幻。總不可信。然總皆可圖。職與本道及海道多方謀之。必有以分台臺之憂也。漁船冊已編成。然不皆可用。職另選壯丁慣海千餘人。以聽調發。此緩急可仗者。其中精銳絕倫。止劉五店五百人爲最耳。若鼓舞直前。則特有台臺威靈在也。

上熊撫臺

叛賊李魁奇與各賊。雖曰合夥。泊船尙自分隸。有三百五十餘隻大船。內不過五十人。小船止有六七人。船雖多。而賊自少。以設計招回者多也。細偵陳盛宇與郭芝葵。似與芝龍有暗通線索之意。然非鑿鑿可信者。前月終。李賊發小船四十隻。近鎮海沂尾。探聽消息。芝龍于廿八日。駕大船十五隻追之。聞風而遁。初一日。芝龍駕大船十五隻出海。與芝虎合夥。招募勇壯約有三千人。芝龍兄弟同心。其氣甚銳。事必可圖。劉五店漁船三十隻。壯丁五百名。職初三日到澳。親自督發。已給發十日糧。每人日給銀三分。俱捐職

俸不動公帑半文也。附近中左鄉兵二千餘人。職令社首領其事。編十人爲一甲。一人規避者。著甲頭報名。以軍法處之。地方亦可無恙耳。

上徐魯人道尊

賊洗劉五店一說。昨防館傳語。職心非之。洗之一字。不宜遽出之口。不意其見之文移也。職恐搖動地方。但當使之協力有備可耳。職于初三日往劉五店。督發漁舟三十隻。壯丁五百名。給以十日糧。協助芝龍出海。壯彼聲勢。蓋俟其至。不如禦其來也。本澳有三社。約有三千人。合力防賊。萬一登岸。自能擒殺。無足慮者。鎮定防備。是今日之事。周張誕謾。助彼賊威。殊可恨也。

上蔡道尊

賊漸近鎮海矣。幸連日北風。不能直上。鄭芝龍得以次第發舟。皆好機括也。中左單虛。附近鄉兵。約有二千餘人。分爲三十二社。職令其每社立一社首。每十人編爲一甲。已親往料理矣。十八保離中左尙遠。且各保只可自守。調發不得也。劉五店漁舟。職于初三日到澳。集耆老商議。此澳壯丁。亦不過千人。對面中左。東南則爲舊活嶼。此賊必繇之門戶也。芝龍亦在此偵賊。一有警息。漁舟于此應援。七十餘舟。齊心願助。但遠離不得。恐其流突。顧彼而失此耳。職尙慮此澳常賊之衝。須會近鄉各保以援之。庶幾壯其聲勢。萬無失著也。

報熊撫臺

初八日。鄭芝龍同劉五店漁兵六百餘名。于鎮海外洋與李魁奇大戰。擒獲賊船四十餘隻。擊沉八十餘隻。賊衆溺死無數。初九未時。漁兵奪幟飛報。魁奇脫逃南走。芝龍同漁船乘勝長驅。想不日卽就擒也。

上蔡道尊

職細訊澳總許克俊云。此日賊船約三百餘隻。若站定對打。勝負竟不可知。虧他望風警遁。以是得有斬獲。大約疆場敗局。全在逃之一字。而今日鄭芝龍可謂傲天之倖矣。此番小勝。正不足喜。然亦可破賊膽。賊嬾供吐。叛夥暗通線索。或有可據。芝龍分付漁民。賊船有下頭篷者。切勿擒殺。意可知也。許克俊等。擒獲活賊三十餘名。另三船被黃贊卿奪去。職戒漁民。莫之不言。恐以爭功開釁耳。許克俊超然漁民之上。似乎可用者。或卽著彼統領各澳壯丁。遇警卽在劉五店取齊。連艘出去。庶幾無參差前後之弊。非借台臺威靈。給劄冠帶。各澳未必聽命也。伏惟裁奪。

答張遊擊

昨得捷報甚喜。喜其落羣賊之膽。以爲擒獲巨首地也。但小勝而懈。兵家所忌。且怨毒愈深。叛賊益甚。耽耽之眈。鄭芝龍倍當臥薪嘗膽。不佞仍督令漁舟助其聲勢也。麾下蚤夜勉勵之何如。

上徐道尊

井尾之戰。雖是小勝。然亦足以破賊膽矣。鄭芝龍所報俱實。以漁民耳目難掩。不敢文飾其說也。十三日。賊復連艘。泊入烈嶼。芝龍整擱成列。與賊相距半里。彼此不交鋒。停泊一日。湊有東北風大發。賊仍開駕。

外洋。彼處居民登山頂。細數賊船。大船止三十隻。餘皆小船。共計二百餘隻。賊心散亂。不敢角鬪。乘風追躡。掃蕩似亦不難。但芝龍船止二十餘隻。漁船五十餘隻。衆寡勢殊。終無膽氣窮追。望台臺弔南日寨船二十餘隻以助之。或可計日收功耳。蓋芝龍之銳氣。在此日可用。不然而持久則氣衰。援寡則氣弱。使其不進不退。僅僅爲株守門戶之計。恐非算也。

上徐道尊

昨有鄭縣被擄吳鳳等三人。在鎮海逃回。供云。初八日之戰。殺死溺死者數百人。目下有南風。定是復來。勝負在此一決。芝龍船俱在活嶼迎敵。漁船仍佐之。刻下必有消息也。吳鳳等云。鎮海過來。並不見接濟。銅山一帶。日日有小船載酒載豬。并綾紬絹段。交與賊衆。今賊船火藥將盡。安知無載火藥而接之者。職素知此接濟之奸。半出于奸民。半出于武弁。奸民酷于射利。武弁但求免禍。海上之事。日壞一日。俱在于此。若不多方禁緝。掃蕩正未有日也。

上蔡道尊

兩日內有從賊逃回者。職細訊之。各賊盡數南去。想此時在揭陽矣。其意在于劫米穀。備火藥。得烏尾大船。春風之便。必圖再舉。大可慮也。及此而多方脩備。乃克有濟。幸台臺示之方略。職敢不蚤夜圖之。

申熊撫臺捐助造船

看得同邑公帑。素無積貯。兼之搜括以來。並無餘銀堪動。該縣卽欲申請。而無從也。且頻年海寇焚劫。戰

艦一空該縣尤當被害之衝請纓禦侮較他縣更倍但同舟念切而螻力無幾願捐俸資親自料理遣巨艘一隻撥充塞遊之用聊以抒共濟之一班耳。

海上近事與

黃東崖 顏同蘭
丁哲初 林讓菴

鄭芝龍自受撫以後其餘黨未散者尙多野性有犯者不肖督鄉兵殺之不可勝計嗣是稍稍知憚不意其同夥李魁奇等爭分賊資以不平激變也九月間魁奇奪船背去招納亡叛與芝龍爲難不肖以爲此正兩賊相持坐收漁利之時也決意鼓舞芝龍同伊弟芝虎整擄赴鬪至十二月初九日魁奇連結陳盛字鍾六周三諸夥以四百餘艘入舊活嶼約戰本縣助以漁舟五十餘隻憤海壯丁千餘人協同芝龍迎敵自初九以至十八日連捷三次殺死溺死生擒者千計而登山解散者不知其幾于是叛賊落魄而逃竟下惠潮正月十五日芝龍復同官漁兵窮追之直至墩下又至鹽州港剛值衆賊攻掠鄉堡半在船半登山不虞芝龍突至四面剿殺衆皆潰亂死散者又不知其幾擒回賊船八十餘隻賊四百餘名此從來未有之快事也然窮兇未剪將來局陣正未可測不肖每稟上臺云目前無他著惟是用芝龍以攻賊借芝龍以脩備兩言便可包括海上之事不知其有當于時務否也不肖知台臺桑梓念切敢備述近事以慰懸注。

上熊撫臺

鄭芝龍鹽州之捷職細偵彼中消息彼時郭芝葵領諸賊正上岸攻打鄉堡賊半在山半在船芝龍猝到

衆皆潰亂。一時殺死、溺死、逃散者。果不可計。芝葵駕小艇而走。此定是芝龍放脫。所以報前日不助戰之恩耳。然此意未可說破也。聞已班師。想不日到中左矣。此番劉五店人船俱不去。芝龍原不欲他去。去則耳目難揜。芝龍不便做事也。總之。若操若縱。有意無意。所以用芝龍者。台臺自有微權耳。

上熊撫臺

把總葉大經汛地舉動。真者未必聞。聞者未必真。以是不敢開列。惟廉其一二之確然者。具揭以聞。此亦足以殺其身矣。陳晉璧先已收監。昨者佯縱之。以誘大經歸。及歸仍繫之。周濱遠遁。差人多方緝獲。亦已成擒。更有大經養兄海仔。自爲名色總時。相隨至今。其細微皆伊所熟知。三犯卽押解漳州。聽施知府拷訊。其情狀自當畢獻也。前院朱老師部覆破城一語。從何生出。地方士民。悲感並切。不日必有公呈。望台臺賜一言昭雪之。庶不爲逃將所累。存公道于萬一耳。

答朱明景老師

某蒙師臺特達之知。名屬吏而情骨肉也。三載卵翼。百身難報。所恨事與心違。終不能効尺寸。以紓師臺之憤。而遲東山之駕。蚤夜思維。通身媿汗。而況千古奇冤。有如今日之事。某更何以宴然眎息于人間哉。憶師臺將行之日。曾云神奸輦載。多方設阱。事至此驗矣。然地方賢達。以至三尺孺子。無不知師臺之冤者。事久論定。昭雪在指日間耳。刻下正值直指按臨。同邑士民。卽當號控。百姓之好義者。往省城具呈撫臺。亮後先同事。必無不白之情也。

答熊撫臺

芝龍嘔餉請餉。大費商量。蒙台臺發銀二千兩。殊有懽欣鼓舞之意矣。本道請告。謂別有所聞。甚是不快。以職管見。想此時萬無去理也。陳盛宇、郭芝葵已先令七船歸順。其餘百船泊在浯嶼外聽令。近有穀商三十餘船。與賊船後先同行。並無擾害。則斂手馴服可知矣。兩接張都司手書。職復之云。船器一一還官。一毫苟且不得。本道既給有免死票。即當隨到隨給散。各歸田里。不得留一人于中左。此今日第一義。彼亦以職言爲然。意必無潦草也。

答葉慕同

爭渡一事。王參老公祖言之甚切。強某結案者。至再至三。某亦心知此事之久鬱求伸。而未敢操刀而割也。竊于力也。茲蒙台命。期于情法兩平。想亦無難了之局矣。貴族之賢者。多好脩自愛。如令叔拱北以微費從事于鼠牙。業已調停。未嘗有偏枯也。若林獻采一案。則某奉院道之命。其親筆單現在所。重搶夷銀以媚賊而自利。嚴催數次。躊躇兩月。而後執之。乃出于萬不得已。台臺固素稱知某者。其非一陳相之所能使明矣。或有告者之過。望台臺矜其愚。而始終噓植之。此亦仁人長者之用心。無俟某啣結也。敢因明問。潦略及此。

答熊撫臺

職讀憲諭。止可言投降數語。真可與日星並耀。職凜凜遵行。期于無負德意爾已。細查降衆初集之日。尙

未得盡散。職徧諭歇家。有容留一人者。卽以窩論。以是居民相戒。彼亦無所容其身。悉行散去。有附近百十人。則皆有父兄妻子。不敢放肆者也。鄭芝龍近已入粵。叛賊勢孤遠竄。今未偵其踪跡。若窮追必須北風。三月之內。恐未能結局。然能勇往承認。便須多方鼓舞之耳。昨按臺經臨。職轉託鄉紳諭芝龍來見。蓋以禮法消其野性。以晉接破其疑城。而職亦得出數語。從中規正。亦鼓舞之一端也。自茲以往。凡可以使之樂爲吾用者。職竊窺台臺威惠並行之妙。以師其意。而竟其施。必無不盡之心矣。

靖海紀略卷之三

答蔡道尊

廿七日。叛賊兩路分船。追至劉五店。事勢窘極。芝龍卽沉舟登岸。帶兵三百餘名。星夜回中左守禦。廿八早。可過渡也。餘船爲出浯洲。尙在活路。劉五店近水民房。昨已被燒數十間。內地未敢入。職督令十三保協力堵截矣。西邊一路。鄉勇如林。賊必不能爲害者。吳防館到縣。出台臺諭帖。讀之。叛賊應自回頭。目前止此著數耳。芝龍弟兄一日尙存。一日尙須駕馭。卽使叛賊不日就吾籠絡。後著變通。正自有無窮作用在也。職管見如此。望祕之。弗使賊先窺吾意。

上熊撫臺

廿七日。芝龍舟泊高崎澳。賊舟東西兩路堵截。賊認定芝龍之船。合衆攻圍。勢必難免。芝龍于是焚己之舟。卽登岸脫走。正在劉五店。賊向積恨此地之人。貼水小屋一帶。俱被焚矣。壯丁執械力抵。殺死數十人。負傷亦多。勢不能勝。而尙能守。以是內地不敢深入也。芝龍廿七晚。帶兵三百餘名。往守中左。廿八早過渡。今與營兵協守城池。諒必無恙矣。芝虎駕船九隻。收入港內。賊耽耽石井。想亦未敢攻也。賊所持止烏尾船。細查之。委是難攻。其船有外護四層。一破網。一生牛皮。一溼絮被。一週迴懸挂水甕。銃不能入。火不能燒。且比芝龍船高丈餘。自上擊下。更易爲力。此皆粵中資以利器。真有無如之何者。若內地。職督領鄉

兵各保力爲捍禦。賊亦相戒不犯。台臺不必懸念。

答王壯其郡守獻

李魁奇似復有搖尾乞憐之意。或可入吾籠絡。舟師海戰。勢不能敵。數動則數敗。卽有援兵。只須于陸地禦其登岸。若郡城萬無足慮。惟職地恐不測。止有率領鄉兵。竭力自守而已。聞賊知本縣有備。相戒弗犯。然不可信。不足恃也。芝龍之守中左。是爲得策。戰勝未能固守。饒爲之。若不入中左而入他處。與逃將何異哉。粵師安可乞。漳泉已不相爲。而欲求援于外省。此必無之事也。趙鎮空拳而來。職以爲不應哭而應笑者。撫臺已有兩稟聞之矣。俟得回諭。再拓智計。百凡職自盡心料理也。

答熊撫臺及各上臺

李魁奇一蠢人。所恃只一黃巽冲。今職已用計招回賊百餘名。各給一免死票。棄船散去矣。渡口小賊船。俱鍾斌之賊。聞鍾斌亦與奇不和。職更圖所以間之。此賊必不復往粵中。然此時南風甚利。北路防其流突。不可不急爲之計耳。中左之圍。一日不解。一日可慮。城中糧食告竭。不憂外攻。而憂內潰。陸兵救援。竟不見到。奈何。職內地有備。自信無虞。無煩懸念。

上熊撫臺

李賊之叛撫。皆出于黃巽冲提掇。流毒閩廣。萬劍不足以誅其罪。但職誘之歸。而旋寘之死。恐塞招徠之路。以是姑寬其詞。以是不疑也。此賊虎狼之狀。見之可畏。職已稟本道。發府獄弗縱之。回以同地賊藪。恐

一有轉念。變不可測耳。聞魁奇失一翼。沖不覺垂首喪氣。其驕不難戢矣。且與鍾斌。周三嫌隙日生。必有自相攻殺之漸。夫以賊攻賊。計莫善于此。前芝龍戰敗。而死者約千人。皆賊也。此亦足明天道不爽矣。攻陷之事。必無可慮。流突之虞。自應謹備。同地各澳。鄉兵如林。有登岸者。輒殺之。庶足以紓台臺南顧之憂耳。

上熊撫臺

芝龍之入中左也。當事者咸欲使之他避。職力持之。謂舍芝龍無與守中左。若舍此而他避。卽日者逃將之故智矣。況芝龍之家在中左。自護其家。守必力也。賊擁百人攻城。芝龍發兩銃。斃賊。魁賊自是不敢攻城矣。人謂賊能取芝龍。而姑舍之。非其實也。畏賊者聞賊至。面如土泥。但知有招撫。不知賊亦解事。自信無再撫之理。萬一賊迷而不悟。謂計必出此。亦何必不出此。果肯交器械。還船隻。得數烏尾船。而芝龍便有起色矣。嗣是而以假腹心與賊。使賊不疑。以真恩義與芝龍。使龍思奮。半年之內。便可芟除立盡。此職所蚤夜躊躇。恐無當于採擇。而未敢遽陳者也。若曰招撫易而題覆難。此又認爲真局面。職不敢妄措一詞矣。伏惟台臺裁奪。

上熊撫臺

十一日鍾斌領烏尾船七隻。大小烏船四十餘隻。竟往東北。職已經稟報矣。聞十二日合鯨在石湖寨。十三日有三四小烏船直入泉城南門。乘其無備。燒燬兵船。猖獗之甚。其半尙泊中左。窺無兵船與角。以爲

可以少少弱賊。坐困芝龍。雖目下城中糧食猶可暫支。久則難繼矣。賊之所畏。止一芝龍兄弟。困之于此。便可橫行于彼。此賊之狡計也。以職管見。必須粵中借用烏尾船。一入南澳。賊必聞風出外。可以解芝龍之困。而使之登船對壘。不知台臺曾有此舉否。不然。而南北肆志。何以禦之。

與趙副總

名廷廷善媚賊與本縣最不相得。追縣鑄銃驅賊故以此應之。

賊把截潯尾渡。須以銃驅之。所論誠爲急著。昨僱匠工料理。必兩旬日始鑄得一銃。然則一日無銃。渡口一日不清。不佞之罪狀。將與日俱積矣。旋而思之。紅夷出沒之地。每多覆舟。其中必有大銃。隨喚漁民善沒水者入覆舟內撈之。許以厚犒。數日間得二十四銃。大者三千餘觔。小者亦不下二千觔。乃知神物不容埋沒。一時並集。若或使之。非人力也。刻下製架演放。力能及二三里外。以之攻賊。未有不糜爛者。昨接台教。止以百名兵留之渡口。不識此百名能守銃乎。倘仍爲盜資。又多一番罪案。恐于門下亦未便也。惟高明裁之。

上蔡道尊

昨趙署鎮云。兵已弔回。止剩百名在此。揣其意。明謂雖有銃無與守也。又一書云。將銃擡至高浦西門。令把總試放。果能及遠。方運到渡口打賊。彼苦無伎倆。則止以不及遠爲辭矣。雖遠而曰近。誰與之辯哉。且此三千餘觔之物。豈一手一足之能運。越潯尾而至高浦。此何意見也。職答之曰。銃刻下製架試過。驗其力能到遠。直當運至潯尾。然須彼撥兵以運。職何能強之。近日賊有大小船十餘隻。在渡把截。非精兵三

百名不能守銃。倘運去而旋被劫。又增一罪案耳。賊意欲撫而懷疑不就。又且索芝龍之銀。是其本意。林應龍亦多鬼語。不可信任。至于團結固守。禦之于陸。乃暫時之計。若借粵東烏尾船。令芝虎領兵。從陸往迎。聲息一到。南澳賊便站脚不定矣。如果去借。制臺萬無不發之理。如有斬焉。彼賊之烏尾大船。從何處得來哉。若我地失事。彼亦豈能宴然高坐者。計不及此。而束手坐困。不知所終矣。伏候裁示。

上蔡道尊

巽冲爲李魁奇謀叛本縣百方誘縛解道道竟釋之復縛解軍院正法

黃巽冲蒙台臺寬恩。不謂其舉動之舛也。渠有姪已官。往拜李賊之妻爲母。往來偵探。不可隄防。且也載金入郡。請託營求。種種叵測。不啻伏莽之戎。職已收之獄中。刻下再當申請。以求正法。庶幾有以快通國之人心耳。

上熊撫臺

職拘澳總許克俊。與之決議再三。止可得六百精兵。其不堪用者。不敢以人數應。船可分駕三十餘隻。最大者亦止三百擔。無巨艦也。惟不甚巨。所以輕捷便利。千石之烏船。不能當也。聞石井亦多漁船。克俊云。可以壯聲援。但不慣戰。見賊而慄耳。又云福興之舟人。不知泉漳之海勢。礁石何在。深淺何處。非用此地之慣海。不可是一說也。賊船在金門者。盡數收回中左近澳。零星散處。所以避火船耳。船有泊海澄之新安港口者。多下篷。或是修補破碎。接濟更當嚴也。以職臆度之。大師不宜輕出。必須從容定計。或使之俛首乞降。或使之聞聲解散。總之。重以馭輕。恃有台臺威靈在。聞芝龍亦云。寧遲無速。意在必得烏尾船。以

圖萬全。或亦非退託之飾說。其如粵中之不發何也。黃巽冲已收獄中。查其近日舉動。再常申解。以候裁奪。

上熊撫臺

十七日賊叛俱駕出。泊大擔、烈嶼、烏沙等處。十八日各起帆。相傳欲北上迎敵兵船。大可慮也。劉五店船已立刻整備矣。鄭芝龍弟兄尚有船數隻。或令漁舟跟踪協勦。庶聲勢不孤耳。

答徐道尊

撫臺所發大兵。竟付之賊炬。不意其遽爾至此。日有慣海者與職言。逆知竹舨之必敗。職力稟於撫臺。止其輕出。孰料叛賊竟乘風迎敵也。目前竟無策耶。聞烏尾船有來近南澳者。不知真否。如真。必當募慣海精兵二三千。令芝龍弟兄登舟力圖之。或克濟耳。然非職所能爲也。

上蔡道尊

粵東烏尾船竟不見到。勦撫兩無所據。將若之何。職亦不敢言力能自固。惟山陸鄉兵。切于自衛。庶幾少有所恃。倘萬分告急。則召募健兒。有劉五店與十八保東西。立應千人。一呼可集。稍可緩則緩之。不敢糜費錢糧。益增罪狀也。

上熊撫臺

職每擒一賊。細問其情狀云。魁奇迫欲招安。恐是騙他。所以芝龍一有省城之行。賊益有不測之慮也。今

芝龍回。賊疑或可稍釋。總之賊心甚狡。口言歸順。而船泊海澄之烏嶼。海滄。與同安烈嶼。馬鑾。地方。日夜澆洗。修整篷帆。曾無息肩之意。職詰之賊云。招安之後。便要往潮羅。穀。呂宋。通販。如芝龍故事。以是急于修船。及問被擄逃回者曰。李賊整船。候南風北上。其意似未肯忘館頭諸澳地也。由此推之。順逆之形。旬日之內可定。而省城近地之防禦。不可不嚴矣。

上蔡道尊

趙署鎮以招撫二字與賊講約久矣。而賊亦以招撫應之。總非賊真心也。且賊至今日而驕極矣。中左近地前後左右。到處擄人。到處搜掠。曾無虛刻。招撫而若是乎。大將軍高坐城樓。目擊賊輩縱橫。差官撫慰。被賊亂打。犇竄無地。猶戒勿放銃。不許各兵出城擒殺。必若是。而後可招撫乎。恐招撫之益難也。賊恨鄉兵。并恨職之甚。志在報復。所望台臺多方羽翼。使免于隕越。拜賜不獨職也。

上熊撫臺及各道尊

賊船分泊海滄。日夜修整。賊徒上山。徧入小鄉村劫掠。坂尾鄉兵憤之。于十七夜統精銳千人。星夜踰山四十里。直入海滄。意圖焚船擒賊。不謂漳民漏報。推船浮水矣。天明賊衆接戰。被鄉兵殺死小賊九名。賊首薩史馬許三老二名。石虎打傷。負之而去。不可以數計。鄉兵被傷二名。並無所損。此亦快舉也。但恨奸人漏洩。不得火其船耳。李賊忿甚。十八十九議分四路攻坂尾。而四方鄉兵數千。雲集各處。埋伏救援。賊不敢逞。然將來未可知也。賊志狡而且驕。我以撫恐賊。賊亦以撫恐我。解紛正未有日。守禦倍當嚴矣。

上蔡道尊

李賊欲撫而小賊以空腹未肯就撫。徧鄉搜掠無所不至。而報仇者日刃數人。日捱一日。趙副總竟不知作何結局也。小民亦知上臺有招撫之議。即力足以抗之者。而斂手未敢。衆心蓋急于求安耳。職正恐求安而愈不得安。惶思未知所措。台臺何教之。

上熊撫臺

李魁奇于初五日弔回各哨船。只許入縣。不許出縣。有賊在路上截剝貨物者。緝之去。一賊不受緝。即梟之。如此舉動。似可入吾籠絡也。數日內。自賊舟回者。陸續投到。職隨到隨發。領即與安插。想賊輩聞之。必無疑畏矣。但聞魁奇祈請太奢。未知台臺何以裁之耳。

與趙署鎮

昨承諭不佞多方爲被擄者地。歸途無恙矣。數日內屢接撫臺札云。已將一點血誠。以待撫衆。萬無他疑者。至于不佞之待李魁奇。猶之待鄭芝龍也。彼願爲門庭以內人。而不佞偏欲拒之門外。如此顛倒。至愚者不爲矣。但魁奇真須毅然果決。解散約束。井井有條。放出丈夫手段。闢開前程大路。方不負此舉耳。

上徐道尊

鍾斌船四十隻。另泊鼓浪嶼。被擄者不肯放。情形叵測。大是可慮。然兩賊正不欲其合。此中最有機竅耳。若李船上被擄者。放回將盡。前月望後。職到劉五店驗放。以防惡少之剝掠。且些須給以盤費。衆皆聞風。

脫走三日而散千餘人。職多方湊合爲主撫者。効一臂。將來另有活局也。

上司李吳磊齋諱麟微。初到任。己巳之春。

中左隸於同安。去縣城僅五十餘里。職之頻年受累。止此一塊土耳。寇之至也。以此爲戰場。寇之撫也。以此爲窟穴。寇至有劫掠之苦。寇撫有調馭之苦。不減于寇至。丙寅年。自楊六初撫。職竟得罪于主撫者。幾以此被參。撫賊得志而愈驕。職力單而益窘。苦可知也。戊辰年。鄭寇與李寇同撫。聚衆三萬餘人。議撫之後。越半年而蟻聚不散者。尙以萬計。仍肆行劫掠。與同民爲難。護持鄭寇者。奉之若驕子。職曰不然。不抑之則蠶不斂。撫不就。日督率同之子弟以撲殺之。約三百餘賊。俱有申詳案證。是時鄭李兩賊。聲聲報怨。而卒不敢動。噫。使李賊此時叛。而職尙復有性命耶。夫以空拳而搏飢虎。走險履危。徼倖于萬一。苦可知也。此皆正月以至七月間事。至十月初旬。而李賊叛去矣。無一將一兵之可恃。止有鼓舞鄭寇。令彼自相熬煎。兩月之內。殺巨首真賊以千計。借賊以勦賊。亦是天道之巧。乃鄭寇足高氣揚。藐眎李賊。入廣窮追。以召今日之禍。至今日而云撫。與前番更難。前者鄭寇目中無人。明知無將兵之足畏。而猶然譎言鼓煽。反覆不定也。今日李寇大讎在側。如坐鍼氈。職欲聯屬之使之信。欲駕御之使之服。卽令武侯復出。恐亦不能。洵是千苦萬苦。苦不了也。台臺亦聞之而心惻乎。所望指之教之。出迷途而登覺岸。拜賜匪淺鮮矣。

上熊撫臺

寇夥逃出有十分之四。今所存船隻大小不過一百六十餘隻耳。王通判廿四日過中左。料理交還船隻器具。恐堪用者未必交還也。有出而解兩寇之紛者。廿二日至同安。令王前驅。齎軍令狀著魁奇發誓畫字。此亦兒戲事。百方修備。惟台臺主持。

答徐道尊

李寇但有貪淫。別無主張。殊不愜鍾斌之意。船踪分泊。其中必有變故。職細細打算。動手不得。出口不得。須密密使斌先叛魁奇。而又須使魁奇全不疑我。方能動而有獲。此非可以旦夕計也。台臺別有著數。惟望時時密示。

上熊撫臺

許一龍係心素子。乃漳州府學生員。巨奸惡種。造謀叵測。勾引李魁奇契子葉我珍。聚集散歸夥衆。置造器械。非一日矣。頃于十五日設酒在家。款待我珍等百餘人。先將家屬搬下我珍之船。一龍領賊數百。從陸至沈宅地方。攻打石兜土堡。有八十餘賊隨龍踰堡直入矣。衆賊環集在山。聽一龍放銃爲號。幸天敗其惡。連放十餘銃不響。山賊不下。鄉兵環堡擒拿。殺四賊而生擒二賊。一龍帶親兵衝圍而出。隨下船脫走。職即發一票。姑云一龍被賊擄去。原無玷於身名。速著族長帶領通族人追之。招伊登岸。又走一諭帖。與李魁奇拘住。勿令逸走。廿日已拿到矣。職即當申解本道也。

上熊撫臺

李鍾兩賊自相疑忌。其機可乘也。但鍾黠而李蠢。使李圖之。不如鍾圖之。使鍾獨圖之。不如芝龍合圖之。蓋獨則勢單。勝負尙半。合則勢盛。有勝而無敗。李賊一鼓可擒也。李光是鍾斌腹心。光向應坐死。職姑緩之。正留其身以爲今日用。已差諭鍾斌。刻下必有消息。芝龍弟兄船盡爲煨燼。無用武之具。職早已豫備漁船五十餘隻。藏之他所。賊所不能蹤跡者。臨期卽調發漁兵千人。駕之以助芝龍也。

答熊撫臺

李賊入我籠絡。而其疑定是難釋。以糧之給否。爲撫之真假。賊衆紛紛叫號。若不給。或卽有變。修備未完。何以制之。職想此賊到底不能羈縻。不若先以少少糧爲餌。容船器完備。再作區處。而聯屬芝龍。是穩著也。

上徐海道

鍾斌於十一月廿七日。駕大鳥船十八隻。叛李魁奇而去矣。斌船泊本縣之金門地方。徘徊觀望。似有意投芝龍而未果者。職已差諭芝龍急收之。聞其有所需於芝龍。乃米糧器械也。職以爲姑與以聯其心。圓轉以觀其變。期于事之必濟。方不虛從前著數耳。職揆情度理。鍾斌未必爲我用。但叛李則李必圖之。兩賊勢同騎虎。我用芝龍以佐斌。驅除大難。所謂因勢利導。不煩鞭策。可安坐而指揮之也。職邊見如此。幸有以教之。

上熊撫臺

鍾斌已叛李魁奇矣。職已密令鄭芝龍收之。本縣漁船及壯丁一一豫整。以待臘月望後便可舉事。但斌最黠。終必不爲吾用。將來下手審局。又別有一番作用。台臺其豫籌之。職自當竭蹶奉命也。

上蔡道尊

此己巳十二月廿八日事

本縣漁船密藏晉江諸澳者五十餘隻。修整完備。枕戈以待。至廿八日早。令鄭芝龍兄弟統領各船。并糾合鍾斌船爲犄角。幸遇順風。不移時而至。中左李魁奇率衆賊力鬪。敗而脫逃。出外遇銃擊。復轉入海澄港。追急下小艇。欲上岸。卽被生擒矣。職先督鄉兵各處埋伏。防其陸逃。廿八晚果有大賊首僞後衝把總曾瓊者。聞風逸走。帶領五十餘賊。各挾利器。渡至石崎登岸。被鄉兵網上。業已收獄。旬日之內。魁奇請餉三四次甚急。職多方騙誘。延推不發。今省得千金。亦可爲船器之資也。

上熊撫臺

廿八日五更。鄭芝龍統領漁兵。糾合鍾斌。揚帆直抑中左。幸天助以風。百餘里之程。不移時而至。亦快事也。魁賊揮衆出戰。船尙百餘隻。賊不下三千。而一時氣奪者。正所謂出其不意。手脚忙亂耳。鍾斌實爲先鋒。魁賊實擒于其手。蓋用其所仇。其手倍辣。而用力更奮也。魁夥僞把總率衆陸逃。職先埋兵以待。一鼓而獲。無一得脫。另當解報。中左腥穢。一彈指間。盡行掃除。此亦近年不經見之事。非仗台臺方略。曷克臻此。雖然。未足恃也。鍾斌積賊多智。使其轉一念。今日之事。我可以藉手于斌。又何不可藉手于芝龍乎。前事後事。覆轍不遠。驚餌之逝。殆不可測矣。惟台臺再籌之。

上熊撫臺

鍾斌復領船南下矣。據稱追擒叛黨，恐猶是假說之詞。此賊狡詐百端，終不肯爲我用也。李賊哨頭時有擒獲，職擇其惡之最者而處之，不如是，無以洩地方之恨耳。芝龍在中左馭衆甚嚴，人心暫與之相安，乘此而修備，爲長久之計，所仗台臺神算匪淺也。

上熊撫臺

鍾斌船盡出泊大寮、圍頭等處矣。穀船漁船，徧被擄掠。芝龍福河載下大桅，以被奪去。芝虎領兵取討，勢必攻殺。劉五店船俱往粵中捕魚，已差人促之歸。數月間亦必回澳。職自當相機調度也。狡賊意在乘風北上，耽耽新造船隻，宜百計防之。

上熊撫臺

葉郁犯柘林甚惡，彼曾無投順之狀，職卽欲開諭之而無從也。前月廿七日已聞鄭芝龍密差人偵之，未知其作何舉動耳。廿五廿七兩日間，鍾斌船盡去，託言征勦葉郁，收功回澳。方食糧散黨，職細察其動靜，到底只是疑懇，其罪業深重，無可消受也。本道所發銀八百兩，職竟齎發吳遊擊，尙未入斌手，卽斌亦不願領，其意之叵測可知，謹備之而已。案葉郁乃李魁奇契子。

又上

鍾斌追擒葉郁，已往銅山之下，聞已擒其小哨一二，郁則遠遁海洋。鄭芝龍委陳盛字往招，未有實息。總

之。斌卽不追。郁亦自必出。蓋狼腹未飽。未可就撫。洋船近日漸回。耽耽逐之。而特借郁以爲題耳。所恃台臺威足以懾。惠足以聯。目下不至于鳴張。而終必不爲吾用也。

上陸筠修司尊諱之

許心素爲鄭弁所殺。向傳以爲眞也。職家台臺委查。卽訊之鄭弁。語多兩岐。則殺似未眞。本府行稟著伊家屬跟要。而素之次男一龍。斃于獄矣。長男樂天。遠竄久矣。若著伊房族挨緝。則踪跡杳然。正犯未必獲。而無辜受累者多。祇爲差役生涯耳。以是職躊躇未決。刻下已取許姓通族與其里鄰公結申府。或可據此結局。而又恐突有未死之心。素出而爲難于海上。眞有難之又難者。其可否。惟台臺裁之。

上熊撫臺

鍾斌船餘仍分泊金門。烏沙。白坑等處。小哨十餘隻。往來中左。擄掠洋客。屢屢見告。今尙分布外洋。以伺商船。乃賊心之貪得無厭。而曰防夷。防葉郁皆託詞也。此賊疑與狡并尙。斂手未動者。全恃台臺孚威可格豚魚耳。萬一終不受吾戎索。則人日衆。勢日強。將何以圖之。職低徊再四。惟台臺裁示。

答徐道尊

近聞鍾斌劫掠洋船。人言其洋船盡。而後招安。職正恐船盡而未必安也。鍾鄭左右彼此。俱有腹心埋伏。一言一動。無不具悉。以是謀事甚難。有心漢子。昨朱明景撫院不惜千金招之。至于舌敝筆禿。必不可得。大抵奇杰之士。千古亦難其人耳。且賊之所收者。非積年熟識之老賊。則挑販無賴之下流。卽有奇士插

入殆不易也。惟台臺再訪之。

上熊撫臺

鍾斌脚跟不穩。意圖逃出。胸中全是危疑。必有以其出爾反爾之語告之者。若一聽其逸出。將來招集亡命。劫奪商船。與海上爲難。我永無安枕之日矣。職已示諭之。聊以釐功爲餌。庶有以繫其手足耳。然此乃羈縻之法。而實實取之。必以威武。蓋取李魁奇之局。可以一試。而不可再陳也。聞斌之疑芝龍。甚欲與龍南北分界立功。此非斌真意。祇因龍所處逼近。近則謀之易。遠則角取難耳。職以爲台臺正當因其疑而用之。弔取芝龍到省城。備船繕器。消彼疑衷。修我實事。數月之內。相機而動。安知斌不復爲魁奇哉。惟台臺詳酌之。

上熊撫臺

時以入覲行。乃庚午之九月。

職五年苦海。備嘗惡趣。所不卽殞越者。恃有台臺逾格鼎噓耳。諸賊渠魁已殲。脅從俱散。惟是鍾斌一夥尙留。遊釜餘魂。迄今閱八月矣。職百計羈縻。以繫其叛足。而戢其毒饑者。端爲船器未備耳。頃入會城。諸武弁來謁云。船楫尙有一二未完者。再假旬餘。便可理帆南勦。而台臺刻期太迫。強之出兵。或亦未便。蓋策貴萬全。速之旬日。與遲之旬日。所爭不遠。而堅瑕乃勝負所關。此一出也。安得不再一審顧哉。又聞一有力者爲斌作說。以毋動爲大職。謂此局終無苟安之法。不毅然獨斷。而滅此朝食。則廟堂之議。恐不可測。台臺亦未能弛于負擔也。職行矣。似可弗復言。而猶不敢以事外寘之。所以報知遇之萬一。且不欲舉

職向來一片苦心。付之一擲耳。惟台臺留意焉。鍾沉後海身死。被從前大寇。至於十二月掃蕩。

靖海紀略卷之四

團練鄉兵初示

同安縣爲團練鄉兵以資守禦事。照得海寇猖狂。人心惶惑。皆緣盛平日久。爾民素不知兵。故一見三五持刃。卽望風奔走。至身家離散。甚爲可憂。但此等醜類。勢雖猖狂。不過以海爲強。登山總無長技。爾等驚逃。則勒索勢無不至。守禦則必然遜去。爾民但能各自奮勇。拒賊何難。爲此示諭通縣鄉邨。及沿海居民。卽便照依保甲。每戶各備堅利器械一件。仍各就保內推擇智勇武藝一人。統率團練。殷富之家。量給鄉兵糧食。以示鼓舞。倘海賊登岸。卽便協力擊殺。此皆爾民自衛身家至計。果能擊殺真賊。及生擒賊夥。本縣定照依院道明文。申請給賞。有功首人。另詳請給冠帶。決不沒爾等功勞也。特示。

團練鄉兵條約

泉州府同安縣爲保固地方事。照得叛寇流突。沿海地方。最宜戒嚴。本縣遵奉上司號令。團會鄉兵捍禦。業已一呼立應。據各鄉都會保團練殺賊頗有成效。但人心渙散。非有紀律約束。野戰未免參差。本縣今將訓練鄉兵條約開示。各鄉都任事人等。遵照施行。俱毋違錯不便。須至示者。

計開

一選壯丁。合保選丁壯幾百名。每日若干名輪流更番守禦。每名每日給銀三分飯食。其哨隊長另行加

給。倘遇賊登岸。一齊擒捉。其未登岸之時。先鳴鑼開保。以便家甲接應。立大旗一面。寫某保選鋒。於百名中作四隊。每隊給一小旗。鑼一面。螺一個。

一編家甲。將所選壯丁外。每十人爲一甲。立一甲長。每保分作若干甲。統於保長副。遇鳴鑼之時。保長副催甲長。甲長催家甲。卽齊集接應。

一別旗幟。每保設大旗一面。每甲小旗一枝。旗依五方色號。大旗書某保團練鄉兵。另一小旗書第幾甲。臨時各依色號無雜。

一精器械。每壯丁各要利器一長一短。諸甲中各要利器時。樹門首。每壯丁給竹甲笠一個。十人給牌一面。千人給銃一個。

一貯糧食。就保內上中下分派。一人收銀。一人給發。

一謹瞭望。每家甲於選壯丁外。各保內日輪二人。到某處瞭望。倘有何事故。卽時到鄉約所。擊鼓聞知。仍赴本保集衆。凡保中有公事。則到鄉約所。鳴金鼓三通。螺單吹。倘是警報。則鳴金。雙螺齊吹。

一修柵隘。各保各巷。俱宜修整柵隘。其柵隘去處。則合衆修整。每日輪一人。到總隘盤驗往來。以杜奸細。其入隘之人。各要石二塊。

一造金鼓。每保各設金一面。鼓一面。螺一個。倘有事故。金螺齊鳴。一保聞知。則衆保俱鳴。

一定賞罰。遇賊登岸時。奮勇擒捉者。官賞外。另一級賞銀貳兩。有退縮不前者。依法行事。其保內遇有事。

故到約所鳴鼓三通。每甲不到者。即時公衆定罰。仍解縣擬罪。一嚴約束。爾輩修隘設兵。總以身家爲慮。所選壯丁及諸甲。除賊登岸。須奮勇擒捉。餘不得乘機生事。違者究罪。

左選鋒長某人

副某人

第一隊隊長某人

鄉兵某人

餘各隊做此

巡視某人

右選鋒長某人

副某人

第一隊隊長某人

鄉兵某人

某保保長某人旗紅色

一甲甲長某人

二甲甲長某人餘做此

選鋒民壯糧食。依本保內家資稍裕者。從公酌議。上中下派助。上助一兩或八錢。中助五錢或四錢。下助三錢或二錢。設一簿。擇謹實之人。一人收貯。一人給散。每保助銀。俱係保長交入。當衆登簿。以便稽覈。其給散之銀。亦即當衆登簿。以便查帳。如有未給。當再商畫。事平之日。將公簿結算。如有餘貯。看一兩用幾錢。一錢用幾分。扣算分還。其有仰體上司德意。念切梓里。破格助銀者。隨其自定。凡諸同事之人。宜相勉飭。以共成勝事。

給鄉兵糧糗議

泉州府同安縣爲固守便民事。照得海氛告警。防備宜周。本縣躬親督率團練鄉兵。正如父兄之於子弟。

腹心之于手足。一體痛癢相關者也。思我百姓。均隸茲土。富者固有身家。貧者豈盡萍浮。若以貧丁而專取給於富家之糧糗。人衆則難給。日久則難支。欲圖安而增擾。於古昔寓兵於農之意。大謬不然。今折而衷之。凡遇本縣操演之日。聽各社殷丁量給貧丁口糧銀二分。萬一有警。執械禦賊。悉照前示。每人日給銀三分。亦須一社之內。通融協力。至於平日。或挑販。或開舖。或附近耕農。聽其各自營生。不得以團練束縛其手足。使有以藉口。而爲殷丁之累。庶幾永成勝事。地方之福也。爾各社長殷戶。毋得驚訝。以致規避取究。此示。

編造漁舟壯丁示

泉州府同安縣爲軍務事。奉軍門熊鈞諭。仰縣召募漁民壯丁。以備協勦。隨稟著各該澳甲。同澳長副查造花名人數候用。去後。間有積包澳甲。不體上意。憚於催督。藉口漁民辦納課餉爲辭。庸知報壯丁。所以防賊。爾各自衛。非是爲兵。但有事。本縣出銀僱募。無事聽汝輩採捕。與課米無妨。合行示諭。爲此示仰該澳澳長甲。及漁民人等知悉。速照原稟報漁民壯丁人數。照劉五店澳編造隊伍册報名。澳長甲各正身速赴縣投遞。面諭方略。俱毋違誤。不便。特示。

申報漁丁文册

泉州府同安縣爲軍務事。奉欽差提督軍務兼巡撫福建地方都察院右僉都御史熊鈞諭。仰縣召募漁民壯丁。以備協勦。等因。依奉隨該卑縣召募過本縣劉五店石埭等澳。慣海漁民壯丁。計壹千玖拾柒名。

聽各澳民序編哨隊甲伍彙造花名文冊印鈐見在合就申報爲此卑縣備錄開列具申伏乞照驗施行須至申者。

團練漁兵款目

一糧餉遇有警報本縣飛檄到澳澳長即時點集出水以是日爲始每人日給銀三分如五日以內獲有賊船首級者除功賞另行外口糧每人日加二分錢糧俱本縣自處給發。

一器械有自備者有官給者及火藥等項澳長各先料理毋至臨時方請致誤事機。

一功次凡兇賊執械拒敵者俱聽澳民登時斬首赴縣報功稟遊將領敢邀搶及買求者稟明申究如真正被擄不持兵仗逃水自匿或偃伏船艙者不許妄殺此又是各人自存心地毋造冥業何俟余言。

一鹵獲凡牽獲賊船惟神飛百子諸大火器報官存用其餘刀鎗及一切所有之物俱聽有功員役自行分取以爲勦賊之資。

一船隻凡以擊賊致有損壞者卽官爲估計給價賠修所獲賊船各存該澳一面整理給澳長收管以便急需。

一應援凡澳口鄰近倘有賊船分踪突入者左右澳長俱須督率澳兵前後邀擊毋得坐眛。

一重督率

泉州府同安縣爲條陳便宜事據劉五店澳澳總高大藩呈稱藩守分澳長近見狂賊縱橫不敢退縮據

前本澳會縣以林芳船爲中軍。許克俊船爲副軍。高方岳船爲總督。劉亦富、高奇顯、童志敬等船十五隻爲衝鋒。一隻管船四隻入俱入。出俱出。遇賊協勦。遇靜採捕。永爲定規。今有警報。三社首既授以權。而衝鋒亦當委之以柄。倘間有撓惑衆志不從命者。許細解究治。則人人聽命。而坐作進退有法。何患攻賊不破。等情到縣。據此案。照先爲軍務事。行著澳總高大藩將本澳漁船編成哨隊。并壯丁姓名。已經造冊申報軍門及興泉。巡海二道外。隨奉軍令。著該澳民出海協勦叛賊。去後。今據前情。合就稟仰衝鋒船長劉亦富。即便管督該澳漁船四隻入俱入。出俱出。遇賊協勦。遇靜採捕。永爲定規。敢有抗違惑衆不聽督率者。許細解本縣。定以軍法處治。決不輕貸。須至稟者。

一定哨總

泉州府同安縣爲軍務事。蒙興泉道左。布政使蔡憲牌。奉軍門憲令。聯絡各澳漁舟。協力應援。已經行縣編造到道。今該縣各澳。未有哨總統領。各汛地未有酌分定派。備牌仰縣。即將所屬各澳漁船。應何哨總統領。後開要害汛地。應以何澳漁船應援。速確具繇報覆查督行案遊遵照。其劉五店一澳。義勇爲最。相應另議協援中左要地。或往來併援各處。併議具報。等因。蒙此行據澳總高大藩等。僉舉許克俊足當哨總之任。等情到縣。據此。除一面呈報本道外。合就帖仰劉五店漁民哨總許克俊。即督該澳漁兵船隻合夥出海。協同官兵勦捕劇賊。不論中左。金門。料羅。澳頭等處汛地。如遇寇警。俱要首尾相救。期于制敵有功之日。另行破格獎賞。決不負爾功勞。敢有抗違不遵者。自有軍法在。勉之慎之。須至帖者。

一議應援

泉州府同安縣爲軍務事。蒙欽差整飭分巡興泉道兼管兵備福建布政使司左布政使蔡憲牌奉軍門憲令。聯絡各澳漁舟。協力應援。已經行據該縣編造到道。查各澳未有哨總統領。至於各汛地應援。未有酌分定派。備牌仰縣將所屬各澳漁船。應以何哨總統領。澳頭。烏沙。金門。料羅。烈嶼。中左等要害汛地。應以何澳漁船應援。其劉五店一澳。義勇爲最。相應另議協援。中左要地。或往來併援各處。一併議妥具報。等因。蒙此。隨該本縣知縣曹看得賊情叵測。所犯之處。未可一定。該縣原編各澳漁船。議欲以本船自防。本澳一有突犯。人自爲守。如上年寇至。往往分犯各澳。則本澳人船。豈肯棄自己而救他人。又況大小參差。堅脆不一。督令遠出征勦。又未便也。其所最稱壯勇人船。可以調遣者。則惟劉五店一澳。已經卑縣設立總哨。許克俊。權宜給帖督令跟蹤出勦。如各處有警。併令應援矣。此外另編各澳壯丁。原以備緩急征勦之用。奉文之日。亦即著令各澳哨總。整備船器。統領壯丁。出與劉五店會。協援各汛地。如憲議分派定援。再查澳頭。烈嶼。烏沙。金門。料羅。各澳汛地。俱一帶相連。首尾原得相顧。有警督令各船兵遊移協援。其於軍法。似尤圓轉也。緣蒙仰令議報事理。合就申詳。

會集協勦

泉州府同安縣爲軍務事。蒙興泉道巡海二道憲牌。奉軍門令牌到道。仰縣即督鄉漁民與官兵協勦叛賊。有功破格行賞。今照叛賊聯鯨內犯。合就仰該澳澳長。著各哨長。即督冊報漁民壯丁。齊集赴劉五

店澳聽興泉道劄授哨總許克俊約束同該澳漁船民兵合餘於中左金門料羅烈嶼澳頭烏沙等處協同官兵勦捕有功破格行賞敢有抗違不遵者即將本人網解送縣治以軍法不貸各毋違錯須至示者

查申漁兵功次

泉州府同安縣爲偏師深入巨寇重圍敗遯克捷事崇禎元年十二月二十五日蒙本府信牌蒙興泉道左布政使蔡憲牌奉軍門熊令牌據守備鄭芝龍報稱親督二十三船并同安縣曹親行調發劉五店義兵漁船擒獲賊犯三十名口小船七隻等因到縣看得鄭芝龍與劉五店漁民能以寡敵衆挫賊衝鋒以寒其膽功殊足錄仰道將鄭芝龍及所統各總紀錄示勸劉五店漁民有功者查賞鼓舞仍行芝龍督兵乘勝長驅務要蕩平海氛以膺題敕其劉五店倡首漁民有功亦一體敕賞擢用全得同安縣親督鼓舞就中恩威操縱苦心協助其勞尤不可泯一併查覈報院以憑特敕等因依奉備牌仰府轉行路將防館查實有功漁民員役分別敕功紀錄等因蒙此除鄭芝龍官兵另行路將防館查敕外備牌仰縣即將劉五店義兵漁船與鄭芝龍南征有功人民分別功次姓名備造文冊一樣三本繳府轉繳仍行該澳漁民用心協勦蕩平海氛以勵後效等因蒙此案查本年十月初間劇賊李魁奇叛撫奪船流突各澳卑縣即先行督飭沿海鄉兵堵截擒殺去後旋奉本都院鈞諭仰縣召募慣海漁民壯丁以備協勦卑縣隨召募過劉五店一澳漁兵四百九十二名堪用漁船二十三隻石滸等澳漁兵共六百單五名計一千九十七名彙造姓名文冊通報外續爲軍務事蒙本府信牌及奉興泉巡海二道憲牌奉本院令牌到道行府帖

縣聯絡漁船民兵。與官兵互相應援。併力攻勦等因。又蒙巡海道憲票。頃見澳民忠壯可嘉。該縣相機發縱。恩信素孚。上下一心。緩急足賴。本道深爲色喜。使宜與申明約束。一切糧餉器械船隻。功次各條款。傳示各澳。長曉諭明悉。勉建功績。以膺官賞等因。又蒙興泉道蔡憲牌。照得叛賊聯鯨北犯。合備牌仰縣。卽調發劉五店澳總高大藩。招集各漁船民兵。整肅隊伍。遇賊賈勇。勦捕有功。照格行賞。獲有賊贓。盡數均分。該縣親行督率。務收獲醜奇功。并奉行查漁船。應以何哨總統領等因。依蒙。隨查有許克俊者。誠實幹練。足當哨總之任。具繇呈請。興泉道給劄。授以冠帶名色。俾得便宜調度。卑縣仍親到劉五店澳督率各漁民。聽許克俊調撥。坐駕船隻。與鄭守備跟鯨協勦。去後。本月十一日。據哨總許克俊。社首黃汝默等。僉呈。爲南征捷報事。稱蒙著督率漁兵協勦。初六日午時開駕。初七日午時到烈嶼城角。與鄭守備齊泊。適報賊至井尾。俊親督林芳等船九隻。同往協攻。餘船四十三隻。駐劄舊浯嶼。接應。初八日黎明。果遇賊船四百餘隻。在井尾港口。兵漁夾擊。犁沉賊船四十餘隻。賊衆溺死無數。當獲穩底船二隻。內穀四十石。百子銃三門。郎機銃三門。撻刀長鎗共十六枝。高岳船生擒賊五名。劉憲周船斬賊首一級。許默船獲賊妻帶幼女共二人。皮甲廿一領。皮整十頂。另大鑳銃五門。大銃子五個。解報到縣。隔別研鞫。真賊一名。葉富。賊嬖陳氏等。其四名何三。紀宇耀。蕭其進。紀宇瑞。俱係被擄。各情真的。隨該本縣知縣曹參看得。撫賊李魁奇出叛。駕言分財不均。與鄭芝龍爲難。芝龍發憤驅除。順逆之志分。而存亡之幾決矣。頃十月初間。魁奇糾集賊夥。連鯨北上。芝龍整戈出勦。氣雖銳而勢尙單。卑縣督令劉五店漁民六百餘名。駕船五

十二隻。初六日開駕。初七日跟隨官兵船。齋泊烈嶼城角。適報賊至井尾。澳總許克俊奮勇先登。帶林芳等九船爲衝鋒。以四十三隻爲後應。初八日大戰。兵漁夾攻。犁沉溺死。不可以數計。現擒船二隻。及稻穀兵器等物。高岳一船。生擒賊五名。劉憲周一船。斬賊首一顆。其一名葉富。向投周三老。今轉投李魁奇。往還閩浙之間。久肆焚殺之慘。其爲真賊無疑也。乃所供同獲四人。曰何三。紀宇耀。蕭其進。紀宇瑞。或擄於官塘山。或擄於梅花所。或擄於蚶江之漁船。其記憶地方年月。供吐畢真。曾無一語指被擄者爲賊。則賊之良心。故自不昧也。及弔何三等。隔別研訊。覆口相同。則其爲被擄益無疑。所當卽行放釋。以雪其冤者也。嬾人一口。供稱陳氏。二月再離。期享賊貲。而嫁賊。死賊旋同露艸。所當官賣。以爲犒軍之資者也。此一役也。朝出師而暮奏凱。雖曰小勝。不足爲喜。而以順勦逆。勢如破竹。亦足見漁民之用命。可謂不負任使之兆也。穀四十石。聽各船均分。船二隻。發澳備駕出勦。皮甲。皮盔。大鎗。銃。大銃子。百子銃。郎機銃。撻刀。長鎗。諸器仗。俱貯庫。賊首一顆。發懸示。五通渡口。具繇於十二月十二日。連人解詳。興泉道蔡查審轉詳。蒙批。出陣獲醜。足挫賊鋒。該縣董率漁兵。功可嘉尙。被擄何三等。已行晉江縣安插。遞解。葉富審係真賊。仰縣確招報奪。賊嬾陳氏。官賣與賊穀。俱充賞格。器械分發各澳禦寇船修用。賊級懸示。漁船四十三隻。爲後應。有無規避不前。一并查明可也。又詳蒙巡海道徐批。該縣指顧不勞。坐收勝算。何渠書生不爲將耶。許克俊宜優賞。以作其氣。賊犯及被擄人等。仰候興泉道詳示行繳。泉州府批。據詳。漁民奮勇助順。朝出而暮奏功。則該縣鼓舞以制勝也。應行申敘。併獎賞漁民。統候道詳示行繳。各遵照外。本月二十一日。

又據劉五店哨總許克俊、澳總高大藩等呈爲擒獲海洋巨賊事。稱本月十八日午時，俊親督董志敬等船二十一隻，全社首黃汝默等哨隊壯丁五百餘名，協勦叛賊。酉時至青崎澳停泊，十九日寅時齊出烈嶼城角，適鄭守備船開駕南下，俊合衆船跟蹤。午時至鎮海洋，遇賊船二百餘隻，兵漁夾攻，銃石雨下，兵船所獲不知其幾。申時收入鎮海澳，俊等船且戰且追，攻圍大賊船，自未至酉，交戰百合。本船被傷漁兵會奸仔、高一龍、舵工李仰懷等十餘人，賊船被銃打壞墜倒，賊衆溺死無數，生擒真賊五十一名，生斬賊級七顆，羣賊望風逃竄，莫知去向。二十日午時，兵船收入中左，酉時俊等船收入本澳，謹情回報。內并將賊犯及首級解送赴縣，隨該卑縣親驗得漁兵會奸仔、高一龍、舵工李仰懷三名，頭額傷重，餘俱各帶傷。是的，弔取各賊，隔別研鞫。黃進老等各供真情在案，仍該卑縣看得叛賊李魁奇糾集各夥，聚蛇蝎於一穴，誇耀黨與之多，傳播譸張之說，幾令懦夫股慄。乃鄭芝龍以二十餘舟當賊數百巨艘，僅僅漁船佐之，奮勇以出，出必有獲，雖人用其命，亦天助其順也。是月十三日，李賊戰敗南下，志在必報，焚小舟而聚衆於大船，以圖必勝。十九日揚帆而來，鄭芝龍發舟迎之，劉五店哨總許克俊選駕大漁船二十一隻，勇壯五百餘名，跟蹤協勦。行到東椗，遇賊船二百餘隻，見我師仍復驚逃，兵船追殺巨艦，漁船圍住烏船二隻，船被擊沉，諸賊溺死，而斬首七顆，生擒黃進老等五十一名口，細訊之，或從叛出逃，或別夥投入，俱已列名。更圖臨陣執械，各各對敵負傷，則爲真賊無疑也。惟是稗年小厮二口，擄爲阿孃，情實堪憐，卽當與開一面者，夫衆寡之勢，相懸數倍，而望風逐北，偏在烏合之衆，乃知賊不敗于弱力，而敗于多心。天若假手

於李賊而招之聚。正所以速之亡也。可爲奮志立功者券矣。賊首發懸渡口。舵工老尤三徧身受傷。隨于二十一日身故。已經相驗發埋。其漁兵曾好仔、高一龍、李仰懷、被傷獨重。應各給銀壹兩。以爲調理之資。童志敬等亦應計功頒賞。具繇連人解詳興泉道蔡覆審轉詳。及通申巡海分守二道。各去後。今蒙前因。遵依行。著哨總許克俊查將統領該澳漁船民兵前後與鄭芝龍南征有功人民。分別功次姓名冊報到縣。覈勘無異。彙造文冊一様三本。印鈐見在。合就申報。

行賞有功

泉州府同安縣爲軍務事。本月初一日。蒙興泉道左布政使蔡憲牌。奉提督軍門熊令牌。照得叛賊李魁奇等。結夥三百餘艘。屢肆侵犯。而鄭芝龍與劉五店義兵。以寡勝衆。屢獲奇功。誠可嘉尙。合就行賞。備牌仰道行縣。即將發去銀壹百兩。內三兩賞哨總許克俊。其船總哨長社首林芳、高岳、童志敬等二十七名暨陣亡被傷漁民。俱聽該縣分別賞賚優卹。完將賞過功次名數。造冊呈報轉繳等因。蒙此。隨行據哨總許克俊全澳總高大藩公議。應賞人數功次冊報到縣。據此。合就發賞。爲此票仰該哨總許克俊將發去銀一百兩全澳總高大藩照單頒賞各船總哨長社首及被傷漁民人等。收領完卽回報。毋得違錯不便。須至票者。

請賑申文

同安縣爲急請發倉。以濟時艱事。照得同安濱海。田少民稠。米穀不給。頃因海寇流突。外運不通。兼之荒

旱頻仍。去秋迄今七月不雨。二麥失種。民益惶惶。計無復之。方今穀價騰湧。斗米百錢。飢孳載道。死亡橫野。目擊傷心。焦思無措。查本縣預備倉。內貯穀五千餘石。原以司賑民命。合無請乞發穀五百石。容本縣於東嶽。梵天與各鄉公所。親行煮粥賑濟。庶幾少救殘喘之萬一。涓滴總上臺之鴻造也。緣係請穀賑飢事理云云。

勸諭捐賑

泉州府同安縣爲賑救貧民。照得年荒民飢。餓孳載道。本縣已經申請倉穀賑濟。指日詳允。卽當煮粥。以甦殘喘之萬一。正在延佇。幸蒙撫院軫念民瘼。特獨廩給銀一百五十兩。發縣買米賑民。如此德意。從來所未有。予叨司牧。豈能怙然。但勢值其窮。欲獨而竟無可獨。姑將本縣俸資百兩。買米助賑。涓滴之施。知無益於涸鮒。而一點相關至情。聊以自表云爾。凡我地方。家溫食厚。故自不乏。誰無不忍之心。亮難爲路人之眎。各隨所願。多寡施賑。本縣不能強。亦不能已於言也。爲此特示。

設法賑濟

從來賑飢。祇有設廠煮粥而已。本縣始亦爲之。集飢民於東嶽廟。其地最寬。可聚數千人。衆飢民至。晝地使坐。數十人分粥。以漸而及。初猶帖然。徐而枵腹難待也。坐者起矣。分者亂矣。越次攘奪。食器俱碎。仍是強壯者得食。老弱者啼飢。于賑之法無當也。于是次日。改而分米。定賑所四。本縣與衙官。及鄉紳蔡虛臺。各居其一。凡男孺成丁者。口給米六合。未成丁者。給米四合。卽襁負者。亦給米二合。賑畢。各所舉銃爲

號。放飢民齊出。庶幾領無重疊。而人得均沾。況袁粥分賑。僅救頃刻之飢。而分米自煮。可飽一日之腹。此法似乎較善。

跋

同里曹方城先生諱履泰。中天啓乙丑進士。出宰同安。時海寇鄭芝龍出沒海島。思絕浙福二省。爲坐臥處。視同安猶几上肉耳。先生曰。吾能以無兵守之。嚴保甲。練鄉勇。諭以自衛法。曰。若保國家。卽保爾妻子。又曰。吾不籍爾民。但以父兄令子弟耳。未幾。芝龍就撫。同黨李魁奇挾鍾斌以叛。蹂躪中左。中左去城三十里許。先生日率父老子弟出軍容甚盛。諸賊相戒弗犯。先生曰。鍾黠於李。吾當使賊自屠之。乃陰攜其黨。不數日。魁奇成擒。斌投水死。海患息。擢吏科給事中。先生以芝龍反覆爲患。乃疏論曰。長勝之算。在於自強。不拔之業。存乎根本。烏附可攻毒。而續命必藉參苓。鍼砭可偶試。而養生必資五穀。閩之用芝龍。烏附也。偶試之。鍼砭也。選將鍊兵。舉賢治賊。參苓五穀也。不此務而任一芝龍。辦之難哉。會浙東西旱。大吏不以聞。又上書言浙輸輓之煩。加派之重。今民力已竭。加以荒旱。使民坐而待死。不忍言也。使民不肯坐而待死。尤不忍言也。復承間言戚畹不宜與政。及論秦晉撫賊之非。疏凡數上。報聞而已。後疏參李希揆。爲大璫羅織受誣。當戍嶺南。囚服騎驢出都。觀者歎息。至宏光僭號。祁中丞世培疏訟先生冤。至南都。馬士英欲結先生爲緣。先生不可。投劾去。復入閩。見唐王。白鬚戟張。跪起而泣。出見鄭芝龍流涕。反覆勉以盡力。授太常少卿。游至兵部右侍郎。隨唐王起兵。至黃臺。兵潰。先生擲身百丈巖下。兩足血注。氣絕復蘇。遇兩僧。攜至黃巖寺爲僧。子元方求之。強之歸。疽發背卒。元方中崇禎癸未進士。知常熟八閱月。不再出。

先生宰同安時。與大府札論海寇及曉諭約束之文。編爲靖海紀略四卷。照素習聞先生德政。因從其弟孫步垣索其稿。授諸梓。又著有浪吟集一卷。已行世。家世事實具詳邑先輩吳先生太冲所作墓誌銘。不備錄。邑後學蔣光煦謹跋。